



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

**Consolator Fidelis Et Proficientis Animæ seu  
Exhortatiunculæ Spirituales Et Succinctæ In singulas  
Dominicas & Festa anni divisæ, quibûs Confessarius in S.  
tribunali animam Deum verè quærentem paternè ...**

**Eisvogel, Veremund**

**Augustæ Vindelic., 1727**

Exhortatiunculæ Consolatoriæ In singulas totius anni Dominicas.

[urn:nbn:de:hbz:466:1-52716](https://nbn-resolving.org/urn:nbn:de:hbz:466:1-52716)



EXHORTATI.  
UNCULÆ  
CONSOLATORIÆ

In  
singulas totius anni  
*Dominicas.*

Dominica I. Adventus.  
EXHORTATIUNCULA I.

**F**lli! alloquor vos verbis Christi :  
*Scitote, quoniam prope est regnum*  
*Dei.* Terrent & onerant cor-  
pus, aut animam mundi mala?  
Sursùm corda! Jesus ad æterna invitat  
gaudia. Recreatio horaria exhilarat  
animos: quid non poterit vitæ suavitas  
perpetua? Et en! jam imminet: *Sci-*  
*tote; quoniam prope est.*

A

In-

*Instructio meritoria.*

Non ita nos effundamus in corporis solatia, ut obliviscamur æterna. In recreationibus ne deficiamus, examen diligens præmittamus, intentionem accuratam præfigamus, certos actus modestiæ, & temperantiæ statuamus, & solatiô finitô psalmum recitemus : *Quam dilecta tabernacula tua Domine virtutum.*

## II.

**O** tremor ! iterum sistimus coram Judice, qui veniet cum magna potestate, & Majestate, coram qua jam nullus amplius locus misericordiæ pro peccatoribus : Ita D. Bonaventura : *Tanta erit tunc Judicis severitas, & inflexibilitas, quod, si B. Virgo & omnes Angeli, & Sancti, & Sanctæ flecterent genua, & cum lacrymis orarent pro aliquo, qui esset in peccato mortali, Judex non exaudiret eum. O peccatum ! Tunc dominari Christiano ? Religioso ?*

*Instructio meritoria.*

Unum tunc adhuc superest in tremendo  
do

do Judicio anxie animæ solatium. Quod illud? Salvianus demonstrat dicens : *Nullum tunc erit animæ solatium, nisi sola conscientia bona, nisi innocens vita, nisi pœnitentia fructuosa.* Fili ! hanc ut in vitam secum portet alteram, recorder animarum in purgatorio, & per octo dies persolvat pro earum redemptione *Vesperas ex officio defunctorum.* Date, & dabitur vobis.

## III.

**C**Hristum avidè expectamus, mi fili ! benè, videbimus, quia *propè est.* Ne terreamur hujus adventu, in timore hoc sacro Adventûs tempore ambulemus. Ait enim Salomon : *Si non in timore Domini tenueris te instanter, citò subvertetur domus tua.* Ergo time, & ambula operando bonum.

*Instructio meritoria.*

Tempus acceptabile adest. Utamur strenuè. Nugarum satis est. Seria cogitemus. Manè excitatus statim salutet Incarnatum Verbum hoc suspiriò : *Centes millies laudetur SS. Incarnationis Domini-*

*minica Mysterium.* Ad omnes salutaciones angelicas flectat quàm devotissimè, corpore, & animò quietus. Nec dies sit, qui vobis transeat sine unius, vel alterius mortificationis opere. Nulla dies sine linea.

## Dominica II. Adventûs.

### EXHORTATIUNCULA I.

**E**Cce! Deus mittit angelum suum S. Joannem, ut retrahat impios à via impietatis: Bonos verò ad omnem erudiat justitiam, & sanctitatem. Improbi, quos inter & Herodes, non admittunt monentem. O infelicem! nam *omnis anima, quæ admonitionem respuit, incurabilis est.* S. Greg. Naz.

#### *Instructio meritoria.*

*Bonus admoneri gaudet, ait Seneca, pessimus quisque correptionem patitur asperrime.* Bonus ut sit, mi fili! ad obviam correctionem, vel superioris admonitionem inclinatò capite aliud non respondeamus, quàm: *Fiat, ut Deus vult, & optat superior;* Murmurationem  
verò,

verò, & internam impatientiam, ut providè evellamus, manè, meridie, & vespere procidentes in terram, eandem humiliter exosculemur dicentes: *Domine! auge correctiones: Sed & auge cum humilitate patientiam.*

## II.

**C**Ujus ita obliviscitur humana fragilitas, quàm benefactorum? malefacta marmorì, beneficia inscribimus mari & aquis. Alius est Divinæ Benevolentiae stylus. Vix S. Joannes confessus est Christum, & hic plenìs velis excurrit in laudes Joannis: *Cæpit enim Jesus dicere ad turbas de Joanne, eumque plùs, quàm Prophetam deprædicat. Grati simus; & vivemus in ore omnium.*

*Instructio meritoria.*

Minima qui spernit, paulatim decidet. Fili! hæc fortè commisimus? non tegamus, sed & ad S. Tribunal pro fideli confessione deportemus, & idcirco nos quàm humillimè accusemus, satisfacturi quoque incuriæ nostræ unum

ex *Psalmis pœnitentialibus* coram SS. Venerabili quotidie persolvamus. Fiet, ut curâ minimorum, beneficia promereamur majora.

## III.

**Q**uid ô fili! Christus, ne in eo scandalizemur, hortatur, & monet: omnia, quæ fecit, bona, & sancta sunt. Unde igitur occasio scandali? quia *alium* expectamus. Non placet Christi humilitas, nec paupertas, nec Christiana fortitudo ac patientia. Non ita, non ita vobiscum, dilecte fili!

*Instructio meritoria.*

Beatus, qui in Christo non fuerit scandalizatus! beatus, qui in Christi humilitate, patientia, & paupertate fuerit delectatus. Delectemur & nos, & in qualibet ex prædictis virtutibus exerceamus quinque speciales actus, & hoc fiat usque ad confessionem proximam. His verò salutis diebûs ne obliviscamur nostrum, (quotidie recitabimus *Lytanias de dulcissimo Nomine Jesu*) cum tessera diurna

diurna : *Non alius : Sufficit mihi unicus, qui solus Jesus est.*

## Dominica III. Adventûs.

### EXHORTATIUNCULA I.

**D**uo latent in hodierna Dominica. Cognitio sui : *Tu quis es?* & interius in spiritu gaudium : *Gaudete.* Utrumque est necessarium tam incipienti, quàm progredienti in via Domini. Primum ut eò humilior sit in oculis Dei : Secundum, ut eò generosior spernat mundi gaudia, & sola quærat ac desideret immortalia.

#### *Instructio meritoria.*

Citò igitur ad Verbum Incarnatum, à quo impetrabimus omnia. Oremus in hunc finem *tres primas Decades ex Rosario Gaudioso cum Psalmo : Quàm dilecta tabernacula tua Domine virtutum.* Deus imminet, ardeant pectora!

### II.

**M**iremur hodie S. Joannis simplicitatem. Colitur, & honoratur ut Christus. Sed renuit clamans : *Non sum.*

A 4

Ah!



Ah! Fili! non videamur boni, sed simus in opere, & cum veritate. Nam bonus videri, & non esse, turpis hypocrisis est: bonus esse, & non videri, magna sanctitas est.

*Instructio meritoria.*

Exemplum sumamus veræ Virtutis ab humilitatis Magistra, Dei Matre Maria. Mater Dei est: & quis credidit hoc tempore? Nemo: *non enim erat ei locus in diversorio.* (Ut ad solidam perveniamus sanctitatem, coram ara B. V. *novem Ave* cum toties repetendo Cantico: *Magnificat* persolvamus.) Sit filius æqualis parenti.

III.

Quærunthodie Pharisæi Christum Dominum; sed non inveniunt. Unde? quia non quærunt in loco debito. Quærunt extrâ, & in deserto, cum tamen esset in eorum medio. *Medius stetit vestrum.* Non sic, ô fili! nobiscum, intûs est Deus. Stringamus, teneamus!

*In-*

*Instructio meritoria.*

Sensus claudamus, visum præcipuè.  
 Igitur dum sumus in ecclesia, clausis hodie oculis *Rosarium* recitemus *gloriosum*, neque recedamus sine susceptâ Communionem spirituali. O si oculi nostri semper ad Dominum! O si sursum tenderent corda, & pia suspiria!

## Dominica IV. Adventus.

## EXHORTATIUNCULA I.

**F**lli! scit utique, quàm bene ipsi voluerit SS. Trinitas, mittendô Dei Unigenitum, ut indueret hominem? voluit nimirum ut Deus fieret homo, & homo fieret quasi Deus. Quanta dignitas! sed ubi retributio?

*Instructio meritoria.*

Instant dies ultimi, & consummabitur negotium Redemptionis nostræ. Præveniamus, & usque ad Festum Nativitatis quotidie ante cubitum *illa 7. O. Majora* ferventissimè oremus sæpius per diem cum Patribus è limbo suspirantes: *Rorate cæli desuper, & pluant nobis*

A 5

nobis

*nobis Iustum.* Captivi sumus : Clamamus !

## II.

**M**andatum Dei est : *Parate viam Domini.* Quomodo ? baptisimò poenitentiae, seu humilitate, odiò nostrum, & vitæ austeritate. Sic rectas facimus vias Salvatoris sæculi. Fili! quid statuemus ?

*Instructio meritoria.*

Tempus S. Adventûs transit : Si sine fructu, redimamus adhuc his ultimis diebûs, quotidie actus reflexæ mortificationis in mensa exercendo, & psalmum : *Benedic anima mea Domino. & omnia, quæ intra me sunt &c.* subjungendo. Gratia D.N.J. apparebit : Et quis ad excipiendam non properet ?

## III.

**B**ona nova ò fili! *videbit omnis Caro salutare Dei,* annuntiat hodiernum evangelium. Si *omnis caro:* ergò & vestra, si humiliata, si crucifixa, si & adventanti Jesulo fuerit assimilata. *Humilis veniet, ut de sua humilitate celsi-*

Dominica infr. Oct. Nativ. Dom. II

*celsitudinem sterneret mundi*, ait Hugo Victorin.

*Instructio meritoria.*

Exultabunt ossa humiliata! exerceamus nos usque ad solemnia festa in variis tum humilitatis, tum abstinentiæ, tum vigiliarum, aut sacri rigoris corporalis operibus, quorum licentiam petamus à Patre spirituali. Gaudium verò nostrum ut sit plenum, quotidie novies canticum *Magnificat* dicamus, & quidem in honorem novem Mensium, quibus B. Virgo Unigenitum Dei portavit in virgineo utero, & hoc est parare viam Domini: Hoc est videre salutare Dei.

Dominica Infrà Octavam Nativitatis Dominicæ.

EXHORTATIUNCULA I.

**F**ili! miremur ex hodierno Evangelio Annæ Prophetissæ in Dei servicio fervorem, & constantiam; etiam post octoginta duos annos *non discedebat de templo*. Multos annos desideramus, eosque

A 6

eosque

eósque semper fortunatos ? properemus  
ad domum Dei : In Ecclesia invenie-  
mus.

*Instructio meritoria.*

O nos felices, quibus datum toties in  
templo agere cum Deo ! agnoscamus  
gratiam, & summâ oculorum modestiâ,  
morum gravitate, & arctâ taciturnitate  
hodiernis horis intersimus Canonicis.  
Et ne quid in oculis Dei indecentius  
committatur ab aliis, oremus *quinde-  
cim Pater & Ave* cum psalmo : *Letatus  
sum in his, quæ dicta sunt mihi &c.*  
Deus nos videt.

II.

**O** Quanta erant Mariæ gaudia, dum  
Jesum ab Angelis mundo annun-  
tium, & à Magis adoratum vidit, &  
exosculata est. At Cor Mariæ immuta-  
tum est, dum hodie audit : *Tuam ipsius  
animam pertransibit gladius.* Adeò  
nulla est hujus vitæ ab adversis securitas !

*Instructio meritoria.*

Compatiamur Matri Amabilissimæ, &  
in contestationem filialis compassionis  
sub-

subjungamus planctum dolorosum :  
*Stabat Mater dolorosa.* Amor aut fa-  
cit, aut invenit similes. Maria ! nec  
tu, nec ego sine vulnere.

III.

**J**esus crescebat *sapientiâ, & gratiâ.*  
Annos habemus, mi fili ! sed quid  
sunt illi sine meritis, sine virtutibus, &  
bonis operibus ? vivere oportet, non,  
ut comedamus, bibamus, tripudiemus  
&c. sed ut in spiritu, gratiâ, & omni  
sanctitate, & justitia quotidie proficia-  
mus. Sic Jesus jubet, sic & propria ur-  
get conscientia.

*Instructio meritoria.*

Discamus invigilare tempori, nosque  
longioribus interdum subtrahere recrea-  
tionibus. Horam dein subtractam vel  
in ecclesia, vel in cubiculo piis lectioni-  
bus, devotis orationibus, aut medita-  
tionibus impendamus ardentissimis. In  
honorem totius ætatis Christi 33. *Pater*  
& *Ave* addamus cum psalmo : *Benedic*  
*anima mea Domino, & omnia, qua in-*

14 Dominica quæ & Vigil. Epiph.  
*trame sunt, nomini sancto ejus. Anni  
crescunt pietate.*

Dominica quæ & Vigilia  
SS. Epiphaniæ.

EXHÖRTATIUNCULA I.

**E**Cce! defunctus est Herodes. O si  
id recogitasset antea, non in tan-  
tam incidisset tyrannidem! Amice! ut  
in officio boni Christiani, aut sanctioris  
Religiosi contineatur, discat quotidie  
mori.

*Instructio meritoria.*

A manè & nocte pro omnibus defun-  
ctis, ut constantem nobis impetrent  
mortis memoriam, recitemus quotidie  
psalmum *Miserere cum De profundis*. Et  
si cœmeterium quoddam in vicinia, sin-  
gulis diebûs ibi sepultos aquâ lustrali  
consolemur, & dicamus: *Te ergo quæ-  
sumus Domine Jesu! tuis famulis sub-  
veni, quos pretioso sanguine redemisti.*

II.

**A**H! quid hoc? fugere debent cum  
Jesulo Maria, & Joseph. Fugere,  
quia

Dominica quæ & Vigil. Epiph. 15

quia eos pellit crudelis humanitas. Fili!  
sequamur!

*Instructio meritoria.*

Et hodierna die per trinam visitationem nos quàm devotissimè cum his tribus personis detineamus coram Sanctissimo Altaris Sacramento, addentes in honorem septem dolorum, quos sustinuit Maria, 14. *Pater & Ave* cum Rythmo: *Stabat Mater*. Sint nostræ deliciae, esse cum Jesu, & pati cum Maria.

III.

**O** Gaudium! redeunt iterum Jesus & Maria cum S. Joseph. *Mortui enim sunt, qui pueri querebant animam.* Sic Deus providet illis, qui persecutionem patiuntur propter justitiam. Persecutiones breves, & momentaneæ sunt. Dabit & his Deus quoque finem.

*Instructio meritoria.*

Nunquam dejiciamur tempore persecutionum: est Deus nobiscum. Scit, cur, & quid perpetiamur? angariati igitur statim flectamus, & *Psalms graduales*



16      Dominica I. post Epiph. D.

*les* incipiamus. Confide fili! audiet nos Deus, quia Pater misericordiae est, & multae clementiae. Misericordiae Domini! misericordiae Domini! quia non sumus consumpti.

Dominica infra Epiphaniae  
Octavam, seu I. post Epi-  
phaniam.

EXHORTATIUNCULA I.

**H**eu! Maria perdidit Jesum, ac invenit denuo. Verum o quot sunt in mundo animae sine Jesu, quia in statu multorum peccatorum? misereamur, & ut inveniant, & cum invento semper permaneant constantes in gratia.

*Instructio meritoria.*

Recitabimus septem *Psalmos paenitentiales*. Agamus o fili! & praestemus id hodie, quod & egisse, nobis quondam expediet in sempiternum. Expedi autem, multum orasse pro Christiano populo.

II. Fi-

## II.

**F**ili! quid lego ex hodierno Evange-  
lio? en! *Jesus erat subditus illis.*  
Miramur, Deum parere homini? & be-  
nè: est enim res admiratione dignissi-  
ma. Sed unde hæc & tanta Filii Dei  
subjectio? ex amore, & pretio S. Obe-  
dientiæ. In hac & natus, & mortuus  
est. Quis suum jam non humiliet ca-  
put?

*Instructio meritoria.*

Humiliemus & nostrum, & coram  
omnibus nos transeuntibus illud humili-  
ter inclinemus. Dum soli, flectamus,  
& in Venerationem morientis ex Obe-  
dientia Jesu 12. *Pater & Ave* expansis  
brachiis oremus cum suspirio: *Domine*  
*Jesu! paratum cor meum, ut faciam*  
*voluntatem tuam. Deus meus! volui,*  
*& legem tuam in medio cordis mei.*

## III.

**Q**ui quærit, invenit. Quærebant  
Maria, & inveniebant: & *inve-*  
*nerunt in templo.* Fili! scire desiderat  
quærendi methodum? dedit Salomon  
dicens:

18      Dominica II. post Epiph. D.

dicens : *In simplicitate cordis querite illum.* Quid simplicius Mariâ? quid humilior Josephô? quid mirum, si invenerint.

*Instructio meritoria.*

Hac simplicitate ambulemus coram Domino. Ad omnia exercitia flectamus erectis manibus, flectamus & liberi, re-collecti, & quieti. In fine cujuslibet exercitii jungamus *tria Ave* cum Cantico : *Nunc dimittis servum tuum, Domine ! secundum verbum tuum in pace.* Finis coronet opus.

Dominica II. post Epiphaniam.

EXHORTATIUNCULA I.

**D**Efuit hodiè vinum. Jam audio Jesu imperantis vocem : *Implete hydrias.* O quàm bonus est Dominus timentibus se, & animæ quærenti illum. Deest nemini in necessitatibus; & antequàm invocetur, dicit : *Ecce ! adsum.*

*Instructio meritoria.*

Pro acceptis omnibus & singulis beneficiis à primo instanti conceptionis nostræ

nostræ abundanter collatis oremus psal-  
mum : *Benedic anima mea Domino, &  
omnia, quæ intra me sunt, Nomini san-  
cto Ejus.* Et nostras necessitates ulte-  
riùs commendemus Jesu Dulcissimo  
Cordi. Stat apertum : Et negligitur ?  
quid hoc ?

## II.

**T**RIBÛS Verbis patratum est hodie-  
num miraculum : *Implete hy-  
driam aquâ.* En ! Deus plùs delecta-  
tur operibùs, quàm multiloquiis, & ver-  
bis copiosis. Illa reddamus : His par-  
camus

*Instructio meritoria.*

Diebùs collationum, ac jejuniorum  
studeamus silentio, & vacemus soli  
Deo, memores, quis veniat in crastino  
SS. Altaris Sacramento ? Præ desiderio  
ad mensam Angelicam per octo dies  
quotidie semel visitemus sponsum Amo-  
ris, illò alloquentes Psalmò : *Quemad-  
modum cervus desiderat ad fontes aqua-  
rum, ita &c.* Fili ! curramus ! Deus  
expectat nos !

## III. Vi-

## III.

**V**Inum, quod apposuit homo, deficit; sufficit, quod affuderat Christus. O veritatem! deficiunt profectio, & evanescent gaudia, quæ cæcus propinat mundus. Cor enim satiare non possunt; solus Deus est, qui sufficit nobis.

*Instructio meritoria.*

Quòd & nobis sufficiat, probemus in omnibus refectionibus, & corporalibus solatiis, sub his sæpius mentem elevando, spiritualiterque communicando. Illis verò finitis, vel ad ecclesiam, vel ad cubiculum pergamus, & ibidem *Te Deum Laudamus* quàm devotissimè persolvamus, cum interrogatione: *Quid mihi est in cælo? aut quid volo super terram?*

## Dominica III. post Epiphan.

## EXHORTATIUNCULA I.

**M**unditiam diligit Deus. Vix leprosus petiit hodiernus; mox audiit: *Mundare.* Fili! quanto nobis in precio

CIO

tio est puritas animi? dedit Dei gratia :  
Cave, ne prodigamus turpiter.

*Instructio meritoria.*

Super aurum & topazion conscientia, & anima pura. Ut foveatur, *Officium de Immaculata Conceptione* recitemus. Dabit Maria, quod nostra non merentur peccata.

II.

**O** Quanta est vis orationis in divinam voluntatem resignatæ! sæpè oramus, & non exaudimur. Quare? non dicimus cum hodierno leproso: *Domine! si vis.* Sed potiùs: *Sic volo ego.* Sic hæc, vel illa commoditas.

*Instructio meritoria.*

Erectis humiliter manibûs, & flexis devotè genibus pro virtute Resignationis nobilissima offeramus SS. Trinitati *Rosariolum* constans 33. *Ave* cum 5. *Pater.* Pulsemus! clamemus! saltem importunis dabitur.

III.

**O** Jesu humilitatem! prohibet colatum manifestari sanitatis beneficium,

22      Dominica IV. post Epiph. D.

ficiam, monens leprosum : *Vide ; ne-  
mini dixeris.* En! dedit Christus exem-  
plum fugiendi vanam gloriam. Igitur  
detestemur eam : Et id ut eò ardentius,  
& securius.

*Instructio meritoria.*

Assuescamus vel hodie post actiones,  
& opera magis heroica, vel ore, vel  
mente subjungere canticum : *Magnifi-  
cat anima mea Dominum.* Vel : *Bene-  
dicite omnia opera Domini Domino.*  
Sic opera Dei revelare, & confiteri erit  
honorificum.

Dominica IV. post Epiphan.

EXHORTATIUNCULA I.

**M**otus magnus factus est, ait ho-  
diernum Evangelium. Sed ubi?  
*In mari.* Et ego dico : In conscientia  
mala. In hac nulla quies : Consolatio  
nulla. Quem illa inhabitat, amarum  
sui accusatorem portat. Ah! fili! nos  
patiemur?

*In*

*Instructio meritoria.*

Per binum Examen quietemus remor-  
dentem. Assumamus & unam confes-  
sionem extraordinariam, quæ alleviabit  
inquietam conscientiam. Ad modum  
contritionis oremus expansis brachiis  
Psalmum *miserere*. Ah! misereamur  
animæ nostræ!

II.

**N**avigabant Apostoli, & discipuli  
Christi. Et en! *Tempestas facta*  
*est valida*. Sic nec charis suis parcit Je-  
sus, ut sciamus, neminem in hoc mundo  
securum ab adversis. Ergò nec nos ô fili!  
cur tamen adversitatibus dejicimur?

*Instructio meritoria.*

Ut præveniamus tempestatem, dica-  
mus psalmum: *Cum invocarem, exau-*  
*divit me Deus justitiæ meæ*, ex completo-  
rio. Jesus propè est: Respiciamus. Et  
sanè ubi desinit auxilium terrenum, ibi  
adest divinum.

III.

**O** Timidos Christi discipulos! ve-  
hant in navicula sua Dei Filium:  
Et



Et sibi timent : *Domine! perimus.* Planè Deo præsente timendum est nihil. Excipio solum peccatum. Hoc timeamus, & Deum diligamus. Hic timor : Hæc dilectio nobis rapiet cœlum.

*Instructio meritoria.*

Ut ostendamus, quanta nobis de præsencia Dei fides, ingredienti cubiculum statim flectamus, & illò Psalmo saluemus : *Venite! exultemus Domino, jubilemus &c.* Deus mecum!

Dominica V. post Epiphaniam.

EXHORTATIUNCULA I.

**C**UM dormirent homines, venit inimicus homo. O infelicem quietem! O multorum malorum seminarium! benè S. Cyprianus : Si diabolus imparatum invenerit militem Christi, si non sollicitum, si non vigilantem, circumvenit nescium, fallit incautum, decipit imperitum. Id quoties contigit incuriis nobis? Verùm præveniamus.

*Instructio meritoria.*

Labore manuum, & sudore studiorum,

rum, aut aliorum bonorum operum, inter quæ hodierna transigatur dies. In cubiculo igitur, dum soli cum solo Deo sumus, aut scribamus, aut legamus, aut studeamus sæpè ad animæ inimicum reclamantes: *Vade retro Satana!* dicamus insuper Canticum: *Benedicite omnia opera Domini Domino &c.*

## II.

**F**lli! tremendam hodie audiemus ex S. Evangelio sententiam: *Colligite zizania, jubet Christus. & alligate ad comburendum.* Nescimus, an inter zizania, an verò inter triticum simus computandi? an mittendi ad comburendum; an potiùs congregandi in Dei horreum? A Judicio Dei id pendet. Quid agemus?

*Instructio meritoria.*

In brachia ferientis Dei ruamus, & hodie contrito corde illum Rythmum dicamus: *Dies illa, dies iræ, calamitatis, & miseriæ &c.* Humilibus dat gratiam.

B

III. Re-

## III.

**R**ectè dicitur : Homo homini lupus. Nulla sævior homini bellua, quàm ipse homo sibi, si vixerit secundùm sensus, & carnem. Si pereat, ex se perit : Nam stygius draco non deglutit nisi volentem. O damnatam voluntatem, si peccatum sapiat!

*Instructio meritoria.*

Inimico debetur odium, bruto flagellum : Et quid corpori nostro ? genus vitæ durissimum. Hodie humiliemus unò, vel altero actu abstinentiæ, ut desinat grunnire addamus & 15. *Pater ac Ave* expansis brachiis.

## Dominica VI. post Epiphan.

## EXHORTATIUNCULA I.

**O** Quanta mysteria in hodierno Evangelio ! præcipuum verò in verbis : *Minimum quidem est omnibus seminibus ; cum autem creverit, majus est omnibus oleribus.* O fili ! sensus verborum est : à minimis incipiunt, qui  
in

in maxima prouunt. *Nemo repente fit summus.* S. Bern.

*Instructio meritoria.*

Cura minimorum, quia nobis maximè necessaria, ut impetretur à Deo, per 7. dies quotidie unum ex psalmis poenitentialibus recitemus. O si cresceret horror! quantum & arderet coelestium amor!

II.

**V**is aedificium provehere in altum Regni aeterni? à minimo, & imo fundamento incipe humilitatis. Non enim exaltabitur, nisi qui se humiliaverit. Mundus odit superbos: Et Deus portet?

*Instructio meritoria.*

Tota vita Jesu quid fuit nisi humilitas? simus imitatores, & 34. *Pater & Ave* inclinatio capite, & oculis clausis recitemus cum totidem osculis terræ. Videt Deus! sufficit.

III.

**P**rincipiis obsta: serò medicina paratur. *Minimum est! cum creve-*

*rit, majus est.* Cogitatio prava (teste S. Bern.) parit delectationem, delectatio consensum, consensus actionem, actio consuetudinem, consuetudo necessitatem, necessitas mortem. O periculosam negligentiam in rejiciendis cogitationibus primis! sapiemus utique? fili! sed quomodo?

*Instructio meritoria.*

En! medium suggero. Adest tentator! arripiamus citò Crucifixum! vel confugiamus ad Ecclesiam, flexisque genibus psalmum intonemus ex Completorio: *Qui habitat in Adjutorio Altissimi, in protectione Dei cæli commorabitur, & 33.* exosculabimur Jesum. Crucifixi oscula sunt arma, quibus pellitur hostis.

Dominica Septuagesimæ.

EXHORTATIUNCULA I.

**P**ROcul ò fili! cum pigritia! en! primò manè jam exiit Jesus conducere operarios in vineam suam. Ergò & nobis non sit vanum, manè surgere  
ante

ante lucem, quia promisit Dominus coronam vigilantibus.

*Instructio meritoria.*

Auditô primô excitationis signô statim deseramus lectum, & flexis genibûs matutinam persolvamus salutationem Angelicam. A Jesu, & Maria principium!

II.

**R**eprehenduntur hodie otiosi homines: *Quid hîc statis?* & meritò: Non enim hæc vita tempus est otiandi; sed laborandi. Homo nascitur ad laborem, sicut avis ad volatum. Qui non laborat, non manducet. O fili! quæ, vel cujus hæc monita? Christi sunt, & Spiritûs Sancti.

*Instructio meritoria.*

Exequamur, & in Divinis obsequiis specialiter alacres simus, augendo pensum pietatis Christianæ præter ordinarium Rosarium addendo & alterum pro fervore omnium fidelium, præsertim Religiosorum. Qui sibi bonus, erit & aliis.

B 3

III. Quid

## III.

**Q**uid sibi hoc? ultimi æquè ac primi accipiunt singulos denarios. Hæcne æqualis dispensatio? aut retributio? en! ò fili! non *quamdiu*, sed *quam bene*, quàm fervidè & constanter serviamus Deo, interest. Consummatus in brevi potest explere tempora multa, & lucrari mercedem magnam in cœlo. Servimus: Sed quomodo?

*Instructio meritoria.*

Citò redimamus, quæ tam sæpè prodigimus, pretiosa tempora, intendendo fervorem, & devotionem ergà Deum. In satisfactionem negligentiarum omnium nostrarum persolvamus Litanias Majores. Qui multum orat, magna impetrat.

## Dominica Sexagesimæ.

## EXHORTATIUNCULA I.

**N**onne genuini Filii est, defendere Patrem? nonne & fidelis servi proteggere Dominum. Ecce! instant periculosa Bacchanaliorum tempora, quibus

quibus mundus stat totus contra Dominum; ad arma igitur ò dilecte fili! ad singularia pietatis exercitia, & his studeat avertere peccata gravissima, quibus Deus Pater tam bonus, & clemens injuriosè tractatur. Cessa! peccatum fati est.

*Instructio meritoria.*

In hunc finem offerat *officium minus de Dulcissimo Nomine Jesu* cum trina visitatione Sanctissimi. Nolo, ut solus hîc Jesus lateat. Domine! curro, ut te stringam.

II.

**F**ili! ad laborandum, ad seminandum nati sumus; sed quodnam seminandi tempus nobilius tempore tribulationis? hinc S. Bernardus: *Gloriemur in tribulatione: In ea siquidem spes omnis glorie.*

*Instructio meritoria.*

Hâc septimanâ omnes afflictiones patienter sustineamus, Deoque offeramus, ut avertat scelera hominum molliter, & sensualiter viventium, pro quibus *Litania*



*nias de omnibus Sãnctis* persolvamus.  
Quod uni ex his minimis fecistis, mihi  
fecistis.

## III.

**A**Rguitur hodie inconstantia nostra:  
Nam S. Evangelium ait: *Ad tem-*  
*pus credunt, & in tempore tentationis*  
*recedunt.* Ah! quot merita nostrã  
pereunt infidelitate, & inconstantia! in  
bono rerum successu fervemus; in ma-  
lo torpemus. O fili! in Christianis non  
initia attenduntur, sed finis, & perse-  
verantia.

*Instructio meritoria.*

Qualis & piorum erit inconstantia  
hoc periculoso tempore? ut in suo ser-  
vemus fervore, coram SS. Venerabili  
quotidiè per hanc septimanam unum  
Psalmum ex pœnitentialibus offeramus  
Jesu Eucharistico. Si pii recesserint,  
quis honor? vel ubi Amor Dei?

Do-

Dominica Quinquagesimæ.

EXHORTATIUNCULA I.

**E**Cce! ascendit Jesus in Jerusalem, ut tradatur gentibus, illudatur, & occidatur. Ubi autem comites? ubi imitatores? sequitur nemo. Totus vix non mundus hīs Bacchanalibūs stat contra Jesum. Condoleamus, fili mi! & sequamur euntem.

*Instructio meritoria.*

Quorsum? ad conversationem sanctam, & immaculatam, *sobriè*, & *piè* vivendo, & consuetis precibus aliquid superaddendo, nim. *Rosarium Dolorosum*, ut piæ animæ inflammentur erga Jesum; impii autem se convertant ad Dominum. Charitas hīs impetrabit majora.

II.

**C**Æcus inlamar Dominum pro oculorum salute, increpant alii. Clamare non cessat ille. Sic ludit firma in Deum confidentia. Fili! ita agendum in via virtutis. Nunquam hīc cedendum.

B §

dum.

dum. Non enim primo cadit arbor ab ictu. Tu contrà audentior ito. Cecidisti? iterum surge. Et si centies, centies revertere. Ita jubet constans de Jesu Confidentia.

*Instructio meritoria.*

O fides! spes! & Charitas! quàm estis necessariæ homini! & tamen tam rara vestrùm memoria. Ut saltem in nostris radicentur cordibus, 30. *Pater & Ave* coram aliquo Crucifixo recitemus. Aperta cernimus vulnera: Et non credamus? speremus? diligamus? sine fide, spe, & dilectione vivimus mortui. Hæc autem non vita, sed mors est.

III.

**Q**uanta stulticia! impietas quanta! hïs diebûs velle vivere liberiùs, licentiùs, & effusiùs *qui tamen nescimus* (teste Hadriano Papa) *quando, vel pro quanto scelere deseramur à Deo.*

*Instructio meritoria.*

Aliud monitum est S. Augustini: *Deprecanda potiùs est misericordia Dei, ut donet intellectum ad ista damnanda, & affe-*

*affectum ad fugienda, & misericordiam ad ignoscenda.* Veniamus igitur ò fili! ad templum Domini, & recitantes *Psalmos graduales* scelera impediamus gravissima. Filii est, defendere Patris honorem.

## Dies Cinerum.

## EXHORTATIUNCULA I.

**Q**uid audimus? *Memento homo, quia pulvis es.* Eamus ad sepulchra! videbimus ubi cadat omnis humana felicitas, & opum, ac voluptatum potentia. Videbimus, ubi & justorum finiantur labores, & præmiò coronentur perenni. Fili! disce quotidie mori, & coronaberis.

*Instructio meritoria.*

Defunctorum recordatio est nostra ad bonum excitatio. Oremus hodie vespas ex officio defunctorum: Et si fieri potest etiam cæmeteria visitemus. Infirmus fui, & visitastis me.

## II.

**I**n quo consistit vera cordis poenitentia? nunquid externâ tristitiâ? nil

B 6

minùs.

minùs. Sic tristantur hypocritæ. Nos gaudeamus in Domino, maximè, dum sumus in jejunio. Hilarem datorem diligit Deus.

*Instructio meritoria.*

Hanc spiritûs lætitiã ut corde, & ore proferamus, post refectionem vel in templo, vel in cubiculo intonemus *Te Deum Laudamus*. Ululent inferi! gaudeant pii.

III.

**S**atis litatum gustui, & sensibus! quid enim inde, ò fili! traximus lucri? Caput grave, stomachum nauseabundum, vires languidas. Hi fines sunt eorum, quæ corpus appetit, gaudiorum. Verùm infirmo opportunam porrigit medicinam ecclesia, sacrum jejunium, quod corpora sanat, & animas sanctificat.

*Instructio meritoria.*

Initium hodie est S. Quadragesimæ. Bona igitur nobis conscribamus opera, licentiã R. Patris Spiritualis per hos sacre quadragesimæ dies solerter exercenda. Recordemur abstinentiæ, pro qua obtinenda

nenda adhuc hodie unô cibô carebi-  
mus, recitantes hujus locô 15. *Pater &*  
*Ave* cum oratione : *Concede nos famu-*  
*los, quasumus, mentis, & corporis sa-*  
*nitate gaudere &c.* Mortem petit, qui  
ciborum superfluitatem.

## Dominica I. Quadragesimæ.

### EXHORTATIUNCULA I.

**Q**UOD Paulus prædicavit suis Corin-  
thiis, hoc ego spirituali an-  
nuntio Clienti. Ecce! nunc tem-  
pus acceptabile! ecce! nunc dies salu-  
tis. Ecce! tempus, ubi sua diluat pec-  
cata, expungat pœnarum debita, & sibi  
insignia tum virtutis, tum sanctitatis,  
procuret merita. Nundinæ sunt: Quis  
lucrum negligat?

#### *Instructio meritoria.*

Pro felici igitur S. Quadragesimæ au-  
spicio offeratur sacramentalis commu-  
nio cum *Litaniis de omnibus Sanctis*.  
Multis precibus redimuntur neglecta  
tempora.

B 7.

II. Ut

## II.

**U**T Jesus dignè sese disponderet ad opus Redemptionis nostræ, quid agit? en! in solitudinem abit: Populum, & publicum fugit: In deserto se abscondit. Adeò necessaria ad opera magna solitudo sacra. Et nos inter turbas quærimus Deum? quid mirum, si non inveniamus?

*Instructio meritoria.*

Unum specialem quadrantem piis precibus, vel visitationi Sanctissimi, aut sacræ cuidam lectioni hodie impendamus & in venerationem quadragenariæ solitudinis Christi 40. *Ave* cum totidem osculis terræ peragamus. Christus in solitudine, & ego.

## III.

**A** Udi præceptum Domini: *Domini- num Deum adorabis, & illi soli servies.* Si soli: Ergò non sæculo, nec carni, nec diabolo, cujus nos servi sumus, ò fili! utinam Jesu patientissimi! vivimus enim in quadragesima.

*In-*

*Instructio meritoria.*

In Antecessum recitemus in honorem  
& amorem totius ætatis Christi 33. *Pa-  
ter & Ave* cum Cantico : *Benedicite  
omnia opera Domini Domino.* Nostrum  
vivere sit continuum laudare Redem-  
ptorem.

## Dominica II. Quadragesimæ.

## EXHORTATIUNCULA I.

**A**gitur in hodierno Evangelio de be-  
neficio vocationis. Sciat ergò fi-  
lius ex ore Apostolici Doctoris, ipsum  
non vocatum esse in imunditiam, sed in  
sanctificationem in Christo Jesu Domi-  
no Deo. *Et hæc est voluntas Dei san-  
ctificatio vestra.*

*Instructio meritoria.*

Ut in statu suo totus ambulet purus,  
& sanctificatus, coram Sanctissimo reci-  
tet *Lytanias de dulcissimo Nomine Jesu :*  
vel locò harum 15. *Pater & Ave* in ve-  
nerationem 5. litterarum, quibus con-  
stat Nomen Jesu. In hoc Nomine salus.

II. Vi-



## II.

**V**idit Petrus transfiguratum Dominum, & gaudens clamavit: Domine! *bonum est, nos hic esse.* Quale, & quantum gaudium erit, videre faciem desideratam Domini, solis instar fulgentem? quanta lætitia gloriæ Conditoris assistere, & incircumscriptum lumen videre? fili! nondum cupimus dissolvi?

*Instructio meritoria.*

Sursum corda! elevemus ad nostram patriam. Hic permanentem non habemus. Ut eò crescant desideria, recitemus Psalmum: *Quam dilecta tabernacula.* Sitque quotidiana à manè tessera: *Cupio dissolvi, & esse cum Christo.*

## III.

**O**Jesu humilitatem! præcepit discipulis: *Nemini dixeritis visionem, quam vidistis.* Christus fugit vanam gloriam: Et ambiat homo? peccator? pulvis, & cinis?

*Instructio meritoria.*

Satisfaciamus pro nostra superbia, recitantes *Cursum Marianum*, & assuescimus

mus

mus cuilibet peracto operi virtutis sub-  
jungere verba Davidis : *Non nobis Do-  
mine! non nobis : Sed Nomini tuo da  
gloriam.* Pauca sunt : ne negligas.

## Dominica III. Quadragesimæ.

### EXHORTATIUNCULA I.

**Q**uid Magister Cœlestis docet in ho-  
dierno Evangelio? audiamus : ver-  
ba sunt ista : *Qui non colligit mecum,  
dispergit . Et qui non est mecum , con-  
tra me est.* En ! recollectionem com-  
mendat animi , sine qua nulla pax , nulla  
mentis tranquillitas. Fili ! quid egimus  
toties in oculis Dei distracti ? toties va-  
gabundi ?

### *Instructio meritoria.*

Claudamus oculos , & erit nobiscum  
Jesus. Deprecemur nostras distractio-  
nes & evagationes tempore orationis,  
meditationis toties admissas , & in satis-  
factionem *Rosarium dolorosum* clausis  
oculis , & expansis brachiis recitemus.  
State cogitationes ! Deus nos vocat.

II. Dæ-

## II.

**D**æmonium ejicit hodie Christus. Hoc & in nobis residet. Quomodo? per maliciosam voluntatem propriam, quæ peccatorum origo., criminum fomes, & omnium malorum incentivum. Sic S. Laur. Just. Surgamus, ad Jesum veniamus, & ut ab hac vipera nos liberet pessima

*Instructio meritoria.*

Hodiernam sacramentalem Communionem cum accurata temporis observatione offeramus, addentes Rythmum amorosum: *Anima Christi sanctifica me.* Velle meum ô Deus! tolle, & daturum.

## III.

**Q**ui relabitur in antiqua peccata, *fiunt novissima hominis illius pejora prioribus.* Horrenda commonitio! Christus dedit. Et agere contrà, ac in pristinum vilitatis statum reverti non timeamus? O temeritatem!

*Instructio meritoria.*

Propter relapsum, à R. Patre spirituali spe-

specialem quandam poenitentiam satisfactoriam petamus, & recitando *Psalmos graduales* iterum Dei offensi mitigemus iram. Cadere humanum est: poenitere, & satisfacere sanctorum.

## Dominica IV. Quadragesimæ.

### EXHORTATIUNCULA I.

**Q**uid ita necessarium ad profectum in virtute, quàm libertas in spiritu? sine hac, fili! vivemus mancipia misera nostrarum passionum, inordinatorum appetituum, & internarum rebellionum. Non sic, ô fili! libertate filiorum Dei à Christo Jesu emptus est. Agnoscat dignitatem & non degeneret.

#### *Instructio meritoria.*

Libertatem adeò pretiosam ut eò certius desursum impetret, invocet Spiritum S. & in Venerationem 1 2. fructuum Illius oret 1 2. *Pater & Ave* cum hymno: *Veni S. Spiritus.*

### II.

**Q**uinque panibus, & paucis pisciculis saturata sunt quiaque millia hominum.

minum. Ad quid tanta ventris, & stomachi sollicitudo? paucis natura contenta est. Fili! corpus reficere oportet, non onerare, aut opprimere. Cibus de paradiso ejicit, temperantia reducit. S. Chrysoft.

*Instructio meritoria.*

Tantum comedamus, quantum ad sustentandam vitam, & non ad nutriendam voluptatem necessarium est. In quolibet ergo cibo unum mortificationis actum exerceamus. Experiemur, quàm dulcis, & nobilis virtus temperantia, pro qua obtinenda *officium minus de SS. Altaris sacramento* persolvamus. Quàm pretiosior hinc esca latet? Quæramus!

III.

**F**ugit iterum Jesus. Quid sibi hoc? noluit Rex esse, & magnus inter homines, sed Magister patientiæ, & humilitatis. O fili! regnum nostrum non sit de hoc mundo, vel in mortaliū oculis. Quæramus aliud, quod intra nos est: Nimirum spiritum pro Deo,

Deo, & virtute uti liberum, ita & ardentissimum.

*Instructio meritoria.*

Humilis & fugientis Jesu ut simus discipuli, eum comitemur recitantes Psalmum: *Confitemini Domino, quoniam bonus &c.* cum 12. *Pater & Ave* in honorem 12. graduum perfectæ humilitatis. Fili! regia via ad honores est contemptus honorum.

Dominica V. Quadragesimæ  
feu  
Passionis Dominicæ.

EXHORTATIUNCULA I.

**V**exilla regis prodeunt, fulget Crucis Mysterium! jam procul cum jocis, & levitatibus sæculi! oculi & sensus sint in Jerusalem! pergamus: Et en! inveniemus Jesum virum dolorum, leprosum, & omnium despectissimum. Fili! ad amores igitur! ad compassionem!

*Instructio meritoria.*

Fugiamus publicum, & in occulto,  
ac

ac solitudine sancta tandem stringamus Crucifixum. Hunc transeuntes adoremus medio flexo poplite, & salutemus illô amoris suspiriô : *Amor! non amaris? amabo te.* Recitetur hymnus ex Vesperis : *Vexilla Regis prodeunt,* Prodeant & in nostris moribus.

## II.

**D**Æmonii incusatur Jesus. Quanta calumnia! quid responderet Christus? *Non habeo.* Quàm mitis hæc responsio! respondisset alius : Impii Judai! vos habetis! vos ex patre diabolo estis! non sic Christus. Ut discamus, malum pro malo non reddere. *Fiat!*

*Instructio meritoria.*

Pro omnibus offendentibus nos, vel persequentibus offeramus hodie Rosarium de septem doloribus. Sic injurias vindicant devoti Christo famuli.

## III.

**T**ollunt Judai lapides, ut jacerent in Jesum. Quid mali fecit: veritatem dixit; ipsi autem mentiti sunt ei. O ingratitude! sic impius, cùm in  
pro-

profundum venerit, contemnit, & insultat Redemptori, Servatori suo. Quid nos? fili! è quorum sumus numero?

*Instructio meritoria.*

Condoleamus, & pro tanta perfidia fatifaciamus recitandò 33. *Pater & Ave.* In fine jungamus *Te Deum Laudamus.* Honore redimendus est ablatu honor.

Dominica VI. Quadragesimæ  
feu  
Palmarum.

EXHORTATIUNCULA I.

**T**Andem ingredimur scholam Passionis Dominicæ, & Theatrum omnium virtutum. Ecce! hîc humiliavit Deus semetipsum factus obediens usque ad mortem; mortem autem Crucis. O quanta demissio! & hæc Deus: Quid jam statuat peccator?

*Instructio Meritoria.*

Obedientia, & humilitas Christi ut operetur in cordibus nostris, usque ad confessionem proximam tres actus humili-



militatis, & tres obedientiæ exerceamus, & exercitos conscribamus, manibusque R. Patris spiritualis extradamus. Interim pro majori merito exosculabimur quinque Vulnera Jesu sub 5. *Pater & Ave.* Hæc requies mea! hîc habitabo, vivam, & moriar!

## II.

**S**iccine ô fili! filius Dei tradetur Gentibus, & illudetur, & flagellabitur, & conspuetur, & postquam flagellaverint, crudeliter occidetur? ita S. Lucas. Non erimus focii compatiendo? non comites passionem Jesu amorosius meditando?

*Instructio meritoria.*

Erimus! hinc à Recollectione mentis exordiamur instantem S. Passionis hebdomadem. Ideò quantum fieri potest, fugiamus publicum, & servemus silentium. Insuper in venerationem totius Passionis recitemus 33. *Pater & Ave* cum hymno ex Laudibus: *Lustris sex qui jam peractis, tempus implens cor-*  
po-

*poris &c.* Frater Jesu non est, qui nescit pati cum Eo.

## III.

**O**uam devotus hodie in Jerusalem populus erga adventantem Dominum! *straverunt enim vestimenta sua.* Sic est: Quidquid in nostra substantia, & potestate, id omne in Dei impendatur obsequium. *Deo enim proprium est* (ait S. Thomas Aquinas) ut sit centrum *totius amoris.* Diligamus ergo sine modo, diligamus omni modo, diligamus, sicut diligibilis est. Hæc Thom. Villanov.

*Instructio meritoria.*

Et hoc, quando fieri potest convenientius, quam hac hebdomade dolorosa? ergo pro omni die certum actum humilitatis, & mortificationis nobis conscribamus, & ad exercendum à R. Patre spirituali licentiam cum Benedictione petamus. Oremus porrò expansis brachiis Rosarium de quinque dolorosis mysteriis. Jesus tot, & tanta pro nobis: Nos autem quid pro Jesu? O si vel hīs diebūs plurima! maxima!

C

opera

opera illustrissima! Magnum magna decent.

## Coena Domini.

### EXHORTATIUNCULA I.

**E**N! appropinquavit dies, quâ Jesus se totum nobis dedit in edulium. Satietur illô cor nostrum, adeò, ut nihil sapiat amplius, nisi Jesus. Præter hunc valeant omnia! Quid? ô fili! possidentes Deum exoptemus aliud? ubi illud? *Quid mihi est in cælo? & a te, quid volui super terram?* suspirat David.

#### *Instructio meritoria.*

Trinis extraordinariis visitationibus consolemur captivum in tabernaculo Jesum. In prima oremus *Lytanias de SS. Altaris Sacramento*. In secunda officium minus de eodem. In tertia pro veneratione rotius ætatis Christi 33. *Pater & Ave cum Te Deum Laudemus*. Frater fratrem redimat, si verè diligat!

### II.

**H**Odie audiamus ultimam morituri Jesu voluntatem. Quæ illa? *hoc facite in meam commemorationem*.  
Com-

Commendat hīs verbīs quotidianam in templis, & ad sacrificia missæ devotionem, reverentiam, & pietatem. Et nunquid nos negabimus? vae tantæ ingratitude!

*Instructio meritoria.*

Certum hodie nobis statuamus modum audiendi quotidie sacrum: Nimirum recitandò vocaliter usque ad SS. Canonem SS. Rosarium cum aliis precibus. A tempore Consecrationis mentaliter Deo Eucharistico nostras necessitates commendando: Ad *Agnus Dei* spiritualiter communicando: Post sumptionem verò à Sacerdote peractam *septem Pater & Ave* cum *Psal. De Profundis &c.* persolvendo pro lucrandis indulgentiis. Quàm sancta Praxis!

III.

CUM diabolus jam possedisset cor Judæ, Jesus instituit pretiosi Corporis, & Sanguinis sacramentum. O immensa Bonitas, quâ hominis convicta est audacia, & temeritas! profectò quantò magis homo Deum impugnat flagitiis, tantò magis concertat beneficiis.

ficiſ. Fili ! non erubescimus malitiã  
noſtrã ?

*Inſtructio meritoria.*

O quot hominum erunt, qui pro tem-  
pore Paſchali adibunt ſacrilegẽ menſam  
Domini ! avertamus, quia poſſumus, &  
hodie ter coram Sanctiſſimo illum de-  
votionis Rythmum è S. Thoma recite-  
mus : *Adoro te devotè latens Dei-  
tas &c.* cum ſuſpirio S. Franciſci Xav.  
*O Deus ! ego amo te, nec amo te, ut  
ſalves me &c.*

Dies Mortis Dominicæ  
ſeu  
S. Parasceves.

EXHORTATIUNCULA I.

**H**eu ! moritur vita ! ô dolor ! Jeſus  
aufertur ! Crucifigitur Deus ! Fi-  
li ! ubi compaſſio ? omnis creatura com-  
patitur Chriſto morienti : Sol obſcura-  
tur : Terra concutitur : Petræ ſcin-  
duntur : Velum templi dividitur : Se-  
pulchra aperiuntur : Mortui reſuscitan-  
tur : Quid hoc ? & ſolus miſer homo  
non

non compatitur, pro quo solo patitur  
Christus? lacrymæ ubi estis?

*Instructio meritoria.*

Moriamur & nos cum morituro Jesu!  
quomodo? certa formandò proposita,  
quibus futura quàm piissimè transige-  
mus Paschalia festa. Hæc appendamus  
ad Crucem Domini. O quàm grata  
hæc erunt anathemata, addatur & *Offi-  
cium de S. Cruce.* In hac omnis spes, &  
victoria.

II.

**A**gnoscat ô fili! quàm gravia sint  
vulnera, pro quibus necesse fuit,  
Christum vulnerari. *Vulnera autem Je-  
su plena sunt* (ait S. August.) *miseri-  
cordiâ, plena pietate, plena dulcedine,  
& charitate.* Intra hæc quis sese non  
abscondat?

*Instructio meritoria.*

Quinquies per hodiernam diem flexis  
genibus adoremus Crucifixum, & præ-  
missis quinque *Pater & Ave* exoscule-  
mur SS. Jesu vulnera cum gemitu: *Ani-  
ma Christi sanctifica me, corpus Christi  
salva me &c.* curre! aperta sunt.

C 3

III. Quod

## III.

**Q**uod quondam suis Origenes auditoribus, idipsum & meo in clamo filio : *Crucifixum vides, & peccas? ô dilecte!* solus aspectus Crucifixi, & mortui Jesu nostras elicere deberet lacrymas, & quidem in tanta copia, in quanta fudit suas Catharina Genuensis exclamans : *O Amor mi! non amplius peccatum! non amplius peccatum!*

*Instructio meritoria.*

Ut fiat, quid agimus? per omnem vitam statuamus *feriam sextam* perpetua venerari Passionis memoriâ, eam diem aut silentiô, aut S. rigore, aut abstinentiâ recolendo. Hodie oremus *Stabat Mater*. Etiam post Pascha manet Jesus in Cruce : Cur non & nos in amore?

## Sabbathum Sanctum.

## EXHORTATIUNCULA I.

**M**onitum D. Pauli est : Fratres! expurgate vetus fermentum, ut sitis nova conspersio, quia pascha nostrum immolatus est Christus. En! fili mi!  
morien-

moriendum est homini veteri, veteri fermento malorum appetituum &c. & resurgendum cum Christo ad vitam novam, & sanctissimam. Pascha enim quid est nisi resuscitatio mortui mundi ad vitam, eamque perpetuam? ergo alii erimus.

*Instructio meritoria.*

Ad Resurrectionis spiritalis gratiam ut perveniamus, Mariæ assistentiam imploremus recitatione Cursûs Mariani coram sepulchro Domini. Maria potest in caelo omnia homini proficua.

II.

**V**ideo ad sepulchrum Mariam. Video & Matrem inæstissimam; quia ablatum sibi tam crudeliter deplorat filium, Jesum Amantissimum. Fili! accedamus, & lacrymas abstergamus. Quomodo?

*Instructio meritoria.*

Trina S. sepulchri visitatione, & cuilibet unum subjungendo Rosarium in honorem septem dolorum, quos in Passione Domini præcipuè sustinuit Maria.



56      Dominica Resurrectionis Dom.  
ria. Filius non est Mariæ, qui matris  
obliviscitur dolorosæ.

III.

**S**epultus est Jesus. Ubi? *in monu-  
mento novo.* Etiam post mortem  
Redemptor puritatem quærit, & diligit.  
Sepulchrum Christi cor nostrum est.  
O quoties in eo non sepelitur sacramen-  
taliter! caveamus fili! ne quid de homi-  
ne antiquo inveniat. Quæ enim Socie-  
tas Christi cum Belial?

*Instructio meritoria.*

Maria largietur puritatem, sed rogata.  
Recitemus igitur officium minus de Im-  
maculata Conceptione cum quinque  
Psalmis in honorem Mariani Nominis à  
S. Joscione recitari solitis. Maria dat  
omnibus abundanter. Tu teipsum non  
negligas in acceptando.

Dominica Gloriosæ Resurre-  
ctionis D. N. J. C.

EXHORTATIUNCULA I.

**F**ili! liceat præ gaudio interrogare :  
O Mors! ubi est victoria tua? Jesus  
resurrexit : Eductis è limbo Patribus  
victor

victor è sepulchro exivit. Io ô fili! jacet  
ad pedes dæmon! contritus est astutus  
serpens! sepultum ululat infelix pecca-  
tum. Accurramus igitur, applaudamus  
triumphatori. Demus locum Jesu. Hu-  
jus sanguine empti sumus.

*Instructio meritoria.*

Ne haustus in quadragesima dissipe-  
tur spiritus, & nostra tam sanctè operi-  
bus pœnitentiæ exulta maculetur vita,  
hodie recollectionem adhuc continue-  
mus mentis, fugientes publicum, &  
cum solo Jesu agentes, recitemus *Cur-  
sum Marianum cum Te Deum Lauda-  
mus*. Gloriari oportet in Resurrectio-  
ne Domini! procul cum sensuum dis-  
solutione.

II.

**C***Hristus resurrexit.* O magnum  
patientiæ nostræ fundamentum!  
frangant ergò corpus jejunia! labores  
gravent! frigus incurvet! deficiat in do-  
lore vita mea, & anni mei in gemitibus!  
patiar omne, in mortali corpore, non  
durabunt dolores: Resurget splendi-

C 5 dum

58      Dominica Resurrectionis Dom.  
dum, & immortale. S. August. O mer-  
cedem patientiæ!

*Instructio meritoria.*

Ad modum diurnæ tesseræ sæpius per  
diem repetamus verba S. Jobi : Scio,  
*quòd Redemptor meus vivit, & in no-  
vissimo die surrecturus sum.* Ut autem  
feliciter, Rosarium de quinque Myste-  
riis gloriosis offeramus cum gemitu:  
*Domine! quando venies? aut compare-  
bo antè faciem Dei mei?*

III.

**S***I consurrexistis cum Christo, clamat*  
Paulus, *quæ sursum sunt, querite;*  
*ubi Christus est, in dextera Dei sedens.*  
Fili! quid ad hæc nostra proposita? sur-  
rexit, ut nobis sedem in cœlo pararet  
gloriæ. Attendamus, ne morum dis-  
solutione perdamus. Ubi Jesus, ibi sit  
& pia anima.

*Instructio meritoria.*

Vivamus igitur in gaudio spirituali, &  
ter visitantes Sanctissimum Altaris Sa-  
cramentum in honorem quinque Vul-  
nerum Jesu jamjam glorificatorum *de-  
cem Pater & Ave* cum totidem *Gloria*  
*Patri*

*Patri &c. oremus. Audeat amor ma-  
jora, si generosus est!*

## Feria II. Paschalis.

## EXHORTATIUNCULA I.

**S***urrexit Dominus verè. Sic credi-  
mus? fili! nam qui surgit, & iterùm  
cadit, non verè surrexit. Surgere igi-  
tur, & denuò cadere, est quasi non sur-  
gere, imò deterius est, quàm non sur-  
gere. Attendat proin, ne in mala, de  
quibus per S. Quadragesimam heroicè  
surrexit, reincidat in futurum. Relapsus  
provocat Deum.*

*Instructio meritoria.*

*Ecce! sanus factus es! jam noli pec-  
care. Linguae per diem hodiernam sol-  
licitè invigilemus, ne tempore conver-  
sationis deficiat in verba malitiæ. Pro  
perseverantia omnium justorum tres  
primas Decades ex Rosario Glorioso  
cum 12. osculis terræ persolvamus. A  
terra discat tacere lingua.*

## II.

**N***Olunt duo discipuli euntes in Emaus  
dimittere Dominum, rogantes,*

*mane nobiscum.* Fili! si Deum solummodò ad breve tempus teneamus, & quavis peccandi occasione statim dimittamus, verè Dei Bonitatem deludimus: Sed hoc ò quantâ cum impudentia! nec deerit Judicis vindicta. *Perfidus enim* (minatur S. Bern.) *odibilis est, & filius fiet Gehennæ.* Hæc non terreant?

*Instructio meritoria.*

Teneamus, & tenendò stringamus Jesum, ne nostris ampliùs excidat osculis, & amplexibus. Hodie in Emaus est; quæramus visitandò cœmeterium, & quia Resurrectio est mortuorum vita, peccatorum venia, & sanctorum gloria, pro solatio defunctorum *speciale Rosarium* de 5. gloriosis Mysteriis oremus cum *Vesperis* ex officio Defunctorum. Quærite, & invenietis.

III.

**F**ili! ad Resurgentis Jesu aspiramus gloriam? benè. At recordemur, quanta oportuerit pati Christum, & sic intrare in gloriam suam. A Cruce, à Passione quis nos exemit? sacrum nunquid

quid Pascha? minimè; quia adhuc pendet Christus de Cruce.

*Instructio meritoria.*

Fortè diabolus tentabit, paschalia turbare gaudia? resistamus fortiter in fide, recitandò Psalmum: *Confitemini Domino, quoniam bonus.* Tessera sit nobis diurna: *Gaudebo in Domino!* iterum dico: *Gaudebo.* Averfantur hæc gaudia inferi.

Feria III. Paschalis.

EXHORTATIUNCULA I.

**Q**uanta, ô fili! erga incredulum Thomam Dei clementia? *Affer (jubet) manum tuam, & mitte in latus meum, & noli esse incredulus sed fidelis.* Non obliviscar tui, quia in manibus meis descripsi te. En! perpetuam nobis promisit Christus nostrum memoriam. Et hæc respectu illius tam rara in nobis! ô confusio! ô ingratitude!

*Instructio meritoria.*

Cuilibet sacramentali communioni posthac speciale jungamus propositum, quò nostram contestabimur in Deum

fidelitatem ; hodie à temperantia incipiamus , pro qua obtinenda ter spiritualmente communicabimus cum adjunctis temperantiæ actibus, & Psalmo : *Quemadmodum cervus desiderat ad fontes aquarum.* Gustate ; quia suavis est Dominus.

## II.

**E**go sum, ait Jesus stans in medio discipulorum quasi diceret : Ego solus, & non alius mecum, sustinui, passus, & crucifixus sum pro vestra salute : *Pax vobis ! en ! fili !* nostris oportet meritâ consequi effectum Passionis Dominicæ ; nam diligentibus, & quærentibus Deum omnia cooperantur in bonum ; pigris verò & negligentibus in peccatum. Tu quis es ?

*Instructio meritoria.*

A manè, & nocte excutiamus generosè torporem, & pro augendo fervore in Divinis obsequiis, & augendis meritâ oremus Officium de Dulcissimo Nomine Jesu. Jesus ignis est : Accede, & inflammabere !

## III. Ve-

## III.

**V**enit clausis januis ad discipulos  
Christus. Et o quantus oritur  
metus. Dispellit Christus dicens : *Ego  
sum ; nolite timere.* Timendus non est  
Deus, sed diligendus. Quod timen-  
dum, solum peccatum est. Hoc si ti-  
meamus, nunquam habemus, cur Deum  
timeamus? fili! qualis hæc doctrina?

*Instructio meritoria.*

Saluberima. Exequamur, & ut Deus  
in conversatione nostros custodiat sen-  
sus, post mensam coram Sanctissimo  
Venerabili I. O. *Pater & Ave* recitemus  
cum desiderio : *Anima Christi Sanctifi-  
cane &c.* Sic socius erit inter pericula  
Jesus.

## Dominica in Albis.

## EXHORTATIUNCULA I.

**M**oriamur tandem sæculo, ut eò  
perfectiùs vivamus Christo tan-  
quam filii novogeniti. Sed quæritur :  
Quomodo? dico: Puritate, & candore  
mentis ac conscientiae. Ita hodierna  
monet Dominica in Albis. Fili! o si  
mundi fieremus toti!

*In-*



*Instructio meritoria.*

Votum hoc sanctum est : ut confirmet Mater pulchræ Dilectionis, oremus *Officium Majus*. Castam Matrem castus decet filius.

## II.

**P**Acem dat suam nobis hodiè Christus. Unde ergè tanta in cordibus tristitia ? fili ! audiamus S. Chrysostomum : *Nemo leditur, vel turbatur, nisi à seipso*. Omnis inordinatus affectus poena sibi est maxima. Curemus itaque, & sanemus, ne cum pace cordis amittamus & angelum pacis, Christum Dominum.

*Instructio meritoria.*

In actuali commotione nihil loquamur, sed vel orando, vel spiritualiter aliquid legendo, nos intra nos colligamus. Pro conservandâ autem cordis tranquillitate recitemus *Officium* de Dulcissimo Nomine Jesu. Pacem invenit, qui Jesum ore & corde diligit.

## III.

**S**Ic est ! visô Dominô gavisi sunt Apostoli. Profectò totum gaudium nostrum

strum esse debet solus, & unicus Deus. Ita D. August. Qui vult securè, & quietè gaudere, in eo gaudeat, qui non potest perire. Gaudium nostrum non est de hoc mundo. Cur tamen delectamur in eo?

*Instructio meritoria.*

Pateat cor nostrum soli Deo. Ergò ad ecclesiam nobiscum per trinam Visitationem. In prima recitemus *Officium de SS. Altaris Sacramento.* In secunda Rythmum S. Thomæ: *Adoro te devotè latens Deitas.* In tertia *Litanias de SS. Nomine Jesu. Visita, & visitaberis.*

Dominica II. post Pascha.

EXHORTATIUNCULA I.

**A**mor purus non est mercenarius, ait S. Bernardus. O quàm rari Amatores puri! quærunt potissimi, quæ sibi honorifica, commoda, ac delectabilia; pauci, quæ sunt Dei & Jesu Christi. Ex quorum numero sumus? ô si paucorum!

*Instructio meritoria.*

Amor impurus, & mercenarius, ut  
cordi-

cordibus pellatur omnium Christianorum, offeramus Christo Officium de Suavissimo *Nomine* suo, addendo Rhythum S. Franc. Xaverii: *O Deus!* ego amo te. Quis ut Deus!

## II.

**Q**Uod lupus inter oves, hoc peccatum est inter opera bona: *Lupus rapit, & dispergit oves*, ait hodiernum S. Evangelium. Idem facit & peccatum. Rapit, & dispergit Deum, cœlum, omnia, quis sibi non timeat à tam crudeli bestia?

*Instructio meritoria.*

Lupus instat! fugiamus! in hac fuga stat omnis salus. Ut nos præservet Deus, à manè expansis brachiis recitemus Psalmum: *Miserere cum De Profundis*. Latrat dæmon: Quid tum? non mordebit fugientem.

## III.

**D**At Christus animam pro ovibus suis. Quis hic modus, quàm mirabilis ars amoris? petit à nobis, hanc, vel illam sibi donari passionem, tristitiam, & tolerantiam tempore Crucis:  
Petic

Petit voluntatem, & iudicium sibi offerri in victimam : Sed ô ingratitude ! omnia ei negamus. Reddimus potiùs pro bono malum , pro virtute peccatum.

*Instructio meritoria.*

Impugnemus impugnantes nos , & passioni , quâ vehementiùs infestamur , in honorem septem Gaudiorum Beatissimæ Virginis opponamus septem actus contrarios cum Psalmo ter repetendo : *Deus misereatur nostri, & benedicat nobis &c.* Hostis cadit resistentiâ alterius.

Dominica III. post Pascha.

EXHORTATIUNCULA I.

**V**ult Christus Jesus , ut gaudia fallacis sæculi penitùs mittamus , & cum Ipso in solis tribulationibus , tentationibus , & adversitatibus gaudeamus. O fili ! nõnne durum , & asperum hoc mandatum est ? oportet tamen implere , si & ipse cupiat cum Jesu æternùm lætari in cœlis.

*Instructio meritoria.*

Obvias Cruces , & ærumnas hodie accipia-

cipia-

cipiamus de manu Dei gratias agentes, & dicentes : *Quam bonus Israël Deus his, qui recto sunt corde.* Et ut inter adversa semper gaudeamus, & contristemur nunquam, in venerationem 7. gaudiorum B. V. M. recitemus hodie *Cursum Marianum.* Maria in gaudio : Cur tristis est anima tua?

## II.

**M**odicum & non videbitis me. Magna veritas! profectò modici & breves sunt dies hominis, & tota ejus vita quid aliud nisi breve modicum, quò homo vivit, videt, & videtur. Sed paulò post inveniemus eum in tumulo. Sic in ictu oculi clauduntur omnia. Fili! ut quid ergò transitoriiis, momentaneis immergimur?

*Instructio meritoria.*

Legamus ante somnum adhuc aliquid de morte, & sequetur suavissima nox. Mortis memoriam ut in sensibus nutriamus, oremus illum Lessum : *Dies ira, dies illa &c.* cum Psalmo *Miserere.* Beatus, quem si venerit Dominus, invenerit vigilantem.

III. Fi-

## III.

**F**ili! modicum est in comparatione cum coelo, & æternitate, quidquid possidet mundus. Et hęc modicõ multi sibi emere solent cœlum cum Deo; ac plures (& quæ hæc insania?) misérias sibi comparant perpetuas; quia pro Deo & cœlo sibi eligunt mundi, & vanitatum stercora. Nos quid statuimus? si sapimus, Deum cum cœlo.

*Instructio meritoria.*

Suspiciamus igitur patriam supernam cum suspirio: *O quam sordet mihi terra, dum cœlum aspicio.* Et ut crescamus piis desideriis erga Deum, & nostram in cœlis quondam obtinendam gloriam, trinam instituamus Visitationem ad templum, & Ecclesiam, ubi quàm devotissimè persolvamus Psalmum: *Quàm dilecta tabernacula tua Domine Deus virtutum &c.* O Jesu! bonum est ibi esse; faciamus nobis tria tabernacula.

Do-

## Dominica IV. post Pascha.

## EXHORTATIUNCULA I.

**F**ili! non irascamur, aut contristemur, si Deus nobis subtrahat internæ gratiam devotionis, aut alias minus prævisas submittat adversitates. *Expedit enim, ut Christus vadat, & immittendo Cruces sese ad tempus abscondat.* Sic enim veniet Paraclitus, & suis nos visitabit gratiis. Carere Deo propter Deum, summa sanctitas est.

*Instructio meritoria.*

Ad impetrandam fortitudinem, & Christianam constantiam tempore tribulationis recitabimus *tres primas Decades ex SS. Rosario Doloroso in satisfactionem omnis nostræ impatientiæ, & indignationis.* Pati! pati! ô fili! non dejici!

## II.

**Q**uam rara hominibus veritas! plerumque hæc parit odium, & persecutionem. Fili! tu sustine, & sta pro Dei honore non quid iudicet, aut sentiat homo, attende; sed quid bona,

na, & recta dicet conscientia, exequere. Sic eris perfectus Christi discipulus hodie de seipso attestantis : *Ego veritatem dico vobis.* In schola Christi non datur nisi Veritas.

*Instructio meritoria.*

Ut maneamus perpetui veritatis, & Justitiæ cultores, persolvamus in honorem Verbi Incarnati 12. *Pater & Ave* cum totidem *Gloria Patri &c.* & osculis terræ. Premamus labia, ne devient in Verbo.

III.

**F**ili! judicabimur de peccato, & justitia. Credimusne hoc? cur ergo peccare non timemus? cur virtutem, & Deum non diligimus? arguamus jam nos ipsos, humiliando capita nostra, poenitendo de vita præterita, & iniquitates deplorando. Profectò sic nobis Dei tribunal reddemus propitium, Esto judex tui, & non erit Deus.

*Instructio meritoria.*

Ut timorem acquiramus perfectum omnis peccati, simulque cordibus implantemus radicalem amorem veræ sanctitatis.



ctitatis, & justitiæ, unam specialem visitationem Sanctissimi Venerabilis instituemus, & coram eo 33. *Pater & Ave* persolvamus expansis brachiis. Fili! quò proximior Jesu, eò remotior à peccato.

## Dominica V. post Pascha.

### EXHORTATIUNCULA I.

**P**ETITE, & dabitur vobis, non potest abstinere Deus, nec sese continere à nimia liberalitate; perpetuò cupit benefacere. Ideò nos exhortatur, ut sine intermissione oremus, quia sine intermissione vult dare, quomodo ergo irritum facimus votum Dei, & bonum nostrum, nihil petendo? fili! mendici sumus Dei; fiducialiter pulsemus; & aperietur thesaurus indeficiens. Magni Domini volunt rogari.

#### *Instructio meritoria.*

Verùm misereamur præprimis dilectæ Matris, Romanæ Ecclesiæ, pro cujus stabilitate, & incremento recitabimus coram Sanctissimo Altaris Sacramento (tempore tamen opportuno) *Litanias*  
de

*de Omnibus Sanctis.* Amor erga Matrem probat filium.

II.

**V**ultne amari à Patre Cœlesti? fili! ergò Christum diligit; quia ipse dixit: *Ipsè enim Pater amat vos, quia vos me amastis.* Qui Christum non diligit, dispergit, dilectè! hunc solum teneat; cætera contemnat.

*Instructio meritoria.*

Ad impetrandum sæculi contemptum adeamus Cœmeterium, & post præviam transitoriarum vanitatum considerationem vespèras subjungamus ex Officio Defunctorum. Sepulchra inspice, & sapere disce.

III.

**M**onet D. Paulus in hodierna Epistola: *Charissimi Fratres! estote factores verbi, non auditores tantum.* Non quid sciverit homo in via mandatorum Dei, interrogabitur in extremo judicio, sed quomodo eadem observaverit. Scienti bonum, & non facienti peccatum est illi! en! effatum S. Jacobi.

D

In-

*Instructio meritoria.*

Ut verò in accuratum & fidelem Divinorum mandatorum excrescamus executorem, in nostro cubiculo humiliter coram Crucifixo genuflectamus, & cum magna cordis compunctione persolvamus: *Confiteor Deo Omnipotenti &c.* Sicque Jesu doloroso culpam nostram dicamus de omnibus nostris negligentis, præsertim de tot omisissis preciosis virtutum variarum operibus, quæ debuissimus operari ex multiplici instinctu Spiritûs Sancti, & non operati sumus. In fine addamus Psalmum *Miserere.* Peccasti? non erubescere te humiliare.

## Dies Rogationum.

## EXHORTATIUNCULA I.

**P**Uri, & mundi accedamus ad orationem. Induamus nos meritis Christi, quæ nostra sunt: Nam illa nobis commodavit. Per Jesum ergò ô fili! deprecetur Patrem, ut eò promptius moveatur ad dandam vobis petitam eleemosynam. Anne minùs misericors est Deus, quàm nos miseri?

*In.*

*Instructio meritoria.*

Munda ut sit semper oratio nostra, Processioni hodiernæ interfit cum omni gravitate & modestiâ angelicâ, & ex speciali devotione erga SS. Trinitatem persolvamus officium minus de eadem, deprecantes pro distractionibus sub precibus sæpè sæpius admissis. Cor mundum respicit Deus.

## II.

**F**ili! conqueri non possumus de Deo, si nobis non concedat gratias, quas petimus ob Passionem Filii; quia nec nos ob illius mortem volumus deponere culpas, & defectus quotidianos. Quomodo volumus inclinare voluntatem Patris ad nos ob sanguinem Filii, si ob eundem sanguinem nondum statuamus nostram relinquere voluntatem perversam? irreverenter petimus: Et exaudiri *desideramus*? qualis temeritas?

*Instructio meritoria.*

Satisficiamus proin, & coram quadam imagine dolorosa 12. *Pater & Ave* cum totidem *Gloria Patri &c.* recitemus, ac pro sancto odio propriæ volun-

tatis morienti ex obedientia Christo Redemptori offeramus. Obediendò similes erimus Altissimo.

## III.

**M**irum! homines volunt non tam rogari urbanè, sed & humiliter: Et nos Deum præsumimus exorare elati, immodesti, garruli, & distracti? discamus à Christo orare in horto. En! fervet etiam usque ad guttas sanguinolenti sudoris. Ubi fervor? ubi devotio?

*Instructio meritoria.*

Ut imitemur, in honorem omnis à Christo Jesu effusi pretiosi sanguinis 15. *Pater & Ave* persolvamus, quibus & illam jam notam oratiunculam subjungamus: *Respice, quæsumus Domine! super hanc familiam tuam, pro qua Dominus noster Jesus Christus non dubitavit &c.* Ex die & festo Coenæ Domini. Inuncta sanguine Christi ô quàm Deo accepta oratio!

In

## In Festo Ascensionis D. N. J. C.

## EXHORTATIUNCULA I.

**P**Ræcessit Jesus ad nostram gloriám :  
Præparavit nobis sedem à dextris  
Patris. Nostrúm est, vitâ exemplari, &  
contemptu sæculi occupare, & assequi  
eam. Utique non morabimur ? ergo  
citò ad labores ! & ad virtutum itinera.

*Instructio meritoria.*

Uteò feliciùs pergamus, tres primas  
Decades ex SS. Rosario Glorioso recite-  
mus, & in fine inter angelicos jubilos  
intonemus *Te Deum Laudamus*. Læte-  
tur cor quærentium Dominum.

## II.

**V**Adit Jesus. Invitat nos, ut seque-  
mur. Et quomodo ? relinquamus  
mundum ùt Jesus, & deponamus vana,  
inania, transitoria desideria, fursúmque  
tendamus ad immortalia. Sic pervenie-  
mus, ubi regnat Christus Jesus mortis  
triumphator nobilis. Ab exilio itaque  
ad patriam !

*Instructio meritoria.*

Et ne aberremus, solitudinem hodie

D 3

quæ-

quæramus, aut conversationi intersimus  
cautissimi; privatim verò ascendentem  
ad cœlum Christum Dominum comitemur  
Psalmô Davidicô : *Laudate Dominum  
de cœlis, Laudate eum in excelsis.*  
O quàm sordet terra, dum cœlum aspicio !

## III.

**E**Ja dilecte! neglectis terræ sordibus,  
mentem, & oculos ad cœlum convertamus,  
ubi Iesus nos expectat. Abiit Christus  
in requiem suam. Quando ibimus & nos?  
post multam passionem, & patientiam.  
In valle lacrymarum, & miseriæ homo  
ambulat, quamdiu vivit in terra. Et hanc  
tamen ita diligimus? sordescant tandem  
vilis glebæ stercora! nati & dati  
sumus terræ: Vocati verò ad cœlum.

*Instructio meritoria.*

Ibi ut nostram inveniamus optatam  
requiem, hodiernam sacramentalem  
communionem eò ordinemus, diem  
certam per hebdomadem pro morte  
determinemus, huic specialia opera  
designemus, & ut post multos labores  
suavi-

Dominica Infra Oct. Ascens. D. 79

suaviter requiescamus in sinu Jesu, & Mariæ, pro dispositione mortis felicissimæ *Litanias Lauretanas* recitemus cum Vesperis ex Officio Defunctorum. Domine! quando venies?

Dominica Infra Octavam  
Ascensionis D. N. J. C.

EXHORTATIUNCULA I.

**M**onet hodie D. Petrus: *Fratres! prudentes estote, & vigilate in oratione.* Sanè vigilandum, orandum, & sanctè, ac prudenter hīs diebūs vivendum est; quia appropinquat tempus gratiarum. Vivemus autem prudenter, si puritati, ac internæ recollectioni studuerimus exactè. Ah! si Deus intūs, quanta consolatio?

*Instructio meritoria.*

Pro condigna ergò præparatione ad Spiritūs Sancti Adventum imploremus omnes Sanctos Cœlites per *Litanias Majores*, & manè vix excitati, nos statim è lectis proripiamus, & procidentes in genua suspiremus: *Veni Sancte Spiritus.* Recitemus & hoc die Officium minus

D 4

de



de Eo. O Beata dies, cujus initium tantus Deus!

## II.

**E**Cce! stat, & pulsat ad cor nostrum Divinus Hospes. Spiritus Sanctus rogat: Aperi mihi. Quid, fili mi! statuemus? claudamus mundo, carni & diabolo, & solum admittamus Amoris Spiritum. Tunc gustabimus, quàm sit jucundum, relinquere se, & cætera omnia, & duntaxat quærere æterna. Si Deus non placeat, quid erit aliud?

*Instructio meritoria.*

Ut autem in nostris divertat cordibus Amor Divinus, flexis genibus persolvamus *Litanias* de Spiritu Sancto, septemque actus renuntiationis de sæculo speciales exerceamus, & exercitos Ven. Patri Spirituali fideliter exhibeamus, aut pro exercendis paternam efflagitemus licentiam. Amorem amori tribui expedit.

## III.

**O** Quanta in nos Dei Bonitas! Deus non erat contentus, suum dedisse Unigenitum pro pretio Redemptionis nostræ: Desuper fontem aperuit omnium  
nium

nium donorum, dum Spiritum Sanctum promisit. Potuítne Deus, utut infinite potens & Dives, plùs nobis donare? non potuit, quia seipsum dedit. Et qualem à nobis dispositionem exigit ad recipiendum? prorsùs modicam. Deus omnium bonorum plenitudo est; plenitudo verò, nisi vacuum inveniat, se effundere non potest. Cor ergò evacuemus nostrum, evacuemus nobismetipsis, evacuemus desideris sæculi, & omnibus, quæ Deus non sunt. Sic veniet dies, & implebimur Spiritu Sancto. Fili! exinanite! quid moramini?

*Instructio meritoria.*

Ut tantam promereamur gratiam, jugiter ex Adventu repetamus illa *septem O. Majora* cum adjuncto in fine hymno: *Veni Creator Spiritus, mentes tuorum visita &c.* Certaque bona opera per hos octo dies pro condigna cordis præparatione exercere statuamus, sed cum præscitu, & benedictione Ven. Patris Spiritualis. Clama, ne cesses. Tempus non erit ampliùs. Ut invenias, nunc expediat, ut quæras.

D 5

Do-

## Dominica S. Pentecostes.

## EXHORTATIUNCULA I.

**D**Urum est ô fili ! resistere Spiritui Sancto, vel Eum contristari. Et quoties non contristavimus? negligendô Illius Divina lumina? sit tandem finis ingratitude nostræ, & audiamus, quid tantus Hospes nobis imperet, videlicet: *declina à malo, & fac bonum.* En! peccatum horret, & virtutem desiderat. Negabimusne? absit!

*Instructio meritoria.*

Proin ut in fuga, & horrore peccati crescamus, magis, magisque virtutem æstimemus, hodie ordinario Rosario jungamus & alterum sub Mysteriis Gloriosis. Manè excitati à somno, statim elevemus oculos ad cœlum, & Divinum Hospitem invitemus inclamantes: *Veni ô S. Spiritus! reple tuorum corda fidelium.* Sponsam sponsum venerari decet.

## II.

**N**escitis, quia templum Dei estis vos, & Spiritus Sanctus habitat in vobis. Fili! si hoc, necesse est, ut caveamus  
quàm

quàm diligentissimè, ne vel sensus, qui templi hujus sunt januæ, vel cor, quod est sanctuarium, curiositate, aut evagatione foedetur. Simus ergò custodes internæ puritatis.

*Instructio meritoria.*

Ne amittamus, solitarii vivamus ad unam, vel horam alteram. Sic oculi, sic & lingua in quiete erunt. In solitudine verò nostra colloquamur Spiritui Sancto, orandò flexis genibûs 12. *Pater & Ave* in venerationem duodecim Fructuum Spiritûs Sancti accedite, & illuminabimini.

III.

**H**eu! quæ lecta sunt nobis verba Christi! *Cum venerit Ille, arguet mundum de peccato, quia in me non crediderunt.* Spiritus proin veniet Domini, ut condemnet infidelitatem, vel potius fidem mortuam tepidi Christiani, qui cum Christum Jesum verè cognovisset, non tamen sicuti Deum glorificavit; quia fidei suæ per mores corruptos infamiæ notam aspersit, & per improbam vitam divinas impugnavit veritates.

tes. Fili! quæ est vita nostra? si sine operibus bonis, judicabimur graviter. In Jesum credimus? *Fac opera Christi, ut vivat fides tua*, ait S. Bernardus.

*Instructio meritoria.*

Capimus? nulla proin hâc die nobis prætereat hora sine labore, aut pietatis exercitio. A prandio speciali visitatione veniamus ad Jesum, & coram Sanctissimo 15. *Pater & Ave* cum *Credo* persolvamus in honorem quindecim SS. Mysteriorum Vitæ Jesu. Otium fugiamus & ardebimus Spiritu Sancto.

Feria II. post. S. Pentecosten.

EXHORTATIUNCULA I.

**N**ulla in discendo mora datur, ubi Spiritus Sanctus Doctor adest. *Tace*, fili mi! *quiesce*, & *late*. Tunc audies, quid tantus cordi tuo loquatur Deus. Quis nescit, quantum homo indigeat illius alloquiô?

*Instructio meritoria.*

Id ut mereamur frequentius, semel hâc hebdomade saltem nos subtrahamus publicæ conversationi. & locò hujus  
adea-

adeamus Ecclesiam, oraturi 14. *Pater  
& Ave* in honorem septem donorum  
Spiritus Sancti promittentis : *In solitu-  
dine me invenies.*

## II.

**A**D faciendum bonum quid in nobis  
bonus non operatur Spiritus? profe-  
ctò monet, movet, & docet. Monet me-  
moriã : movet voluntatem, & docet  
rationem : Nec minimam paleam intra  
cordis, quod possidet, habitaculum pa-  
titur, sed statim igne subtilissimæ cir-  
cumspeditionis exurit spiritus sapiens, &  
dulcis. Et ô fili! nos tam duri, tam fri-  
gidi, & incurii sumus?

*Instructio meritoria.*

Magnum donum circumspectio! ut  
obtineamus, in venerationem 12. *Fru-  
ctuum* Spiritus S. orabimus 24. *Pater  
& Ave* cum *Gloria Patri &c.* In in-  
gressu autem cubiculi semper genufle-  
ctentes dicamus : *Veni Sancte Spiritus!  
ad te meus suspirat animus.*

## III.

**I**N terra datur spiritus, ut diligatur  
proximus. Datur & è cœlo spiri-  
tus,

tus, ut diligatur Deus. Sicut ergò est una charitas, & duo præcepta, ita & unus Spiritus, & duo munera. Fili! cape tibi hoc, qui spiritum dividis, dum Deum te diligere asseris, & proximum ubique contemnis. *Qui vos spernit, me spernit.*

*Instructio meritoria.*

Petamus igitur Unionem cum Deo, & ut evidentiùs tribuat, coram Sanctissimo meditationem pro opportunitate temporis instituamus de Adventu Spiritùs Sancti cum hymno: *Veni S. Spiritus &c.* & : *Te Deum Laudamus.* Addamus unam, alterámve cibi abstinentiam, quâ nostrum venerabimur Sponsum, & dulcem animæ hospitem. *Quotidie vobiscum sum: Et non cognovistis me? Quid impudentius? homo recordatur hominis: Cur non & supremi Domini?*

Feria III. post S. Pentecosten.

EXHORTATIUNCULA I.

**O** Verbum consolationis! *Ego sum ostium*, ait Christus ipse: *Per me si quis introierit, salvabitur.* Fili! utique

utique intrabimus? & ut oves mansuetæ, simplices & obediens sequamur Pastorem, ne fur veniat, nos mactet, & perdat. Jesu! salva nos! perimus!

*Instructio meritoria.*

Charitas benigna est. Ut peccatores jamjam de salute periclitantes, denuò revertantur ad gratiam Christi, *Litanias de omnibus Sanctis* devotè, & exemplariter recitemus, additò unò, vel alterò mortificationis actu in mensa exercendò. Beati mites, & misericordes, quoniam misericordiam consequentur.

II.

**A**H! quot fures! quot latrones nostræ insidiantur animæ. Et quid volunt, nisi ut furentur, mactent & perdant in cordibus nostris Deum cum modestiæ gravitate, & conversione morum? fili! & non cautè ambulemus? circumspeditione opus est, ne deviemus ab ovili Christi Jesu. Bonus Pastor vocat! sequere.

*Instructio meritoria.*

Cum eo ut perseveremus usque in finem, ut & in Christiana circumspeditione

ne



ne potenter superemus inimicos nostros, ab actibus sæculi nos hodie abalienemus, & lectioni spirituali erecto, ac libero corpore intendamus præmittentes hymnum: *Veni Sancte Spiritus!* & in fine subjungentes: *Te Deum Laudamus.* Vita circumspecta & recollecta Laus Dei magna.

## III.

**U**Num est ovile, unus Pastor; quia una Ecclesia, & unum Caput. Sed en! quod sunt, qui illud despiciunt, & a bono pastore sponte aufugiunt? hæretici, apostatæ, & schismatici hi infelices sunt. Pro quorum reditu, & conversione quid statuimus?

*Instructio meritoria.*

Matrem amat? Jesum veneratur & colit? ne per hæresin passio Christi diutiùs pessumdetur, accedat mi fili! Ecclesiam, & *Psalmos graduales* pro sua pietate recitet, & versus quatuor mundi partes se vertens genuflectat, & cum affectu adorationis dicat: *Te ergo quaesumus, tuis famulis subveni, quos pretioso sanguine redemisti.* Et hoc non sit honora-

nora-

norare, & consolari Matrem? hoc non  
fit, misereri fratrum?

Festum Sanctissimæ, ac Indi-  
viduæ Trinitatis.

EXHORTATIUNCULA I.

**S**Cit, quanta sint beneficia Creationis,  
Redemptionis, Sanctificationis, &  
Vocationis. Et his quid debet? se to-  
rum. Reddat ergò, quod debet toti SS.  
Trinitati. Solvamus! hæc dies est gra-  
titudinis nostræ.

*Instructio meritoria.*

In aliqualem tantæ Bonitatis satis-  
factionem oremus 12. *Pater & Ave*  
cum *Te Deum Laudamus*. Jungamus  
& tres actus heroicis abstinentiæ, qui-  
bûs nostrum probemus amorem SS.  
Trinitati. Deus! quod habemus per-  
te, tibi denuò reddimus.

II.

**I**Nquirere de SS. Trinitate, perversa  
curiositas est: Credere, & tenere,  
sicut sancta tenet Ecclesia, fides, & secu-  
ritas est. Videre autem eam, sicuti est,  
summa, & perfecta felicitas est. Chare!  
non

non & nos eò suspiramus? feliciter per-  
tingemus, si comites habeamus fidem,  
spem, & charitatem ardentissimam. So-  
rores sunt, stringamus.

*Instructio meritoria.*

Et ut firmiter has virtutes Theologi-  
cas teneamus, pergamus ad Ecclesiam,  
& in honorem SS. Trinitatis tria Altaria  
salutemus, ubique recitandò tria *Pater*  
& *Ave* cum *Credo* & tribus *Gloria Pa-*  
*tri* &c. Deus in templis: Quid mora-  
mur? vult quæri! vult rogari! mendi-  
ci & pauperes sumus: Et mendicare  
erubescimus?

III.

**E**Go Deus, & non mutor. O gau-  
dium! multa, & mirabilia operatur  
in nobis SS. Trinitas; verùm manet  
semper Unus, & indivisus Deus. Cur  
homo tam citò mutatur & avertitur à  
bono? & nos imagines simus Sacro-  
sanctæ Trinitatis? deploremus incon-  
stantiam.

*Instructio meritoria.*

Singulîs diebûs Dominicis speciale in-  
eamus pactum cum SSS. Trinitate, &  
quid-

quidquid vel agendum, vel patiendum  
occurrerit per septimanam, absolute  
consecremus ei omnia. Pacto subjun-  
gamus: *quicumque vult salvus esse &c.*  
ad Nomen SSS. Trinitatis profundè no-  
stra inclinemus capita nobiscum illud  
ruminantes: *si Deus ego sum, ubi honor  
meus.*

Festum pretiosi Corporis D. N.  
Jesu Christi.

EXHORTATIUNCULA I.

**D**uo à nobis petit Jesus Captivus in  
Venerabili Sacramento: *amorem  
& compassionem.* Amorem; quia in  
cibum, & potum se nobis obtulit totum;  
compassionem, quia necdum finis of-  
fensarum, ac irreverentiarum, quibus  
quotidie contristatur in suo Amoris Ta-  
bernaculo. Quid igitur agendum, ut &  
diligamus, & diligendò Dilecto compa-  
tiamur?

*Instructio meritoria.*

Pro avertendis gravioribus offensis,  
ac injuriis *Litanias* de Sacrosancto hujus  
Sacramenti Mysterio recitemus in tem-  
plo.

plo. Manè autem excitati per hanc amorosam Octavam citò nos proripiamus ex lectulo, & provoluti in genua suspiremus ad coelum, & totum universum: *Centies millies laudetur & adoretur Sanctissimum Altaris Sacramentum!* Non carebit suo fructu hæc generosa matutina devotio.

## II.

**O** Fili! an non hodie ingemiscamus cum mellifluo Bernardo: *si totum me debeo pro me facto, ac creato: quid addam pro me refecto, & refecto tam mirabili modo!* O perfide munde! vade retrò cum tuis deliciis! has offers, ut corpore & anima primas. Non sic Jesus, qui se totum in ara immolat, ut homo æternùm vivat. Quis non accedat?

*Instructio meritoria.*

Quidquid hodie sumpserimus de cibo, aut potu, intingamus priùs in sanguine, & vulneribus Jesu. O quàm benedicta hæc erit refectio. Nec ulla transeat mensa, ubi circà hujus medium non recolligamus animum, eúmque spirituali communionem mentaliter revolvendò

Rych-

Rythmum: *anima Christi sanctifica me*  
*&c.* non reficiamus. Pro gratitudine  
 ratione instituti SS. Altaris Sacramenti  
 dicamus psalmum: *Benedic anima mea*  
*Domino, & omnia, quæ intra me sunt,*  
*nomini sancto ejus.* Grande Mysterium!  
 sed ubi retributio?

## III.

**D**ilecte! grande nobis paratur con-  
 vivium, in quo Christus Jesus su-  
 micur, recolitur memoria Passionis ejus,  
 mens repletur gratiâ, & cærum nobis  
 datur pignus futuræ gloriæ. O quæ  
 sunt beneficia in hoc Sacramento Amo-  
 ris! & quid rependimus? nunquid of-  
 fensas? injurias? sed hoc non est dilige-  
 re Jesum. Ostendam modum alium.  
 Sic jubet Amor.

*Instructio meritoria.*

Dum soli sumus in cubiculo, genufle-  
 ctamus versus quatuor mundi plagas  
 cum affectu adorationis: *Laudetur,*  
*& ametur centies millies Sanctissi-*  
*imum Altaris Sacramentum.* Subjun-  
 gamus desuper unam, vel alteram visita-  
 tionem dulcissimi Venerabilis extraor-  
 dina-

dinariam. Hospes adest! nugæ valet.  
præcedit Jesus! non novi vos.

Dominica infra Octavam Cor-  
poris Christi,

seu

Dominica II. post Pentecosten.

EXHORTATIUNCULA I.

**C**harissime! noli mirari, si vos odit  
mundus; quia diligitis, & quarit  
tis Deum. Id quod nec dæmon, nec  
patitur sæculum. Nil interest! oderit  
vos mundus! quid tum? vos interim eò  
ferventiùs properate ad Dominum. Quò  
infensior inferis, eò gratior superis.

*Instructio meritoria.*

Properate, inquam, & hodie per diem  
sapius oculos vestros ad cælum levate  
cum suspirio intensissimo: *ò quàm sordet  
mihi terra, dum cælum aspicio!* pro ob-  
tinendo contemptu perfecto sæculi, &  
omnium terrenorum per quadrantem  
visitemus Sanctissimum Venerabile re-  
citantes 12. *Pater & Ave* cum renova-  
tione trium solemniùm Votorum. O  
quàm dulce est vel horum meminisse!

II.

## II.

**O** Excæcatos homines! paratur mensa regia, invitantur omnes, & singuli. Vix aliquis apparet. Et hoc non doleat amanti Jesu? ad solatia, & recreationes corporis quomodo non festinamus? ad Jesu corpus, & sanguinem (ah! fercula preciosissima!) vix pedem levamus, nauseantes quasi cum Israëlitis super cibo isto levissimo! quæ hæc ingraviduo! irreverentia quanta! erubescamus, dum vel solùm recordamur.

*Instructio meritoria.*

Satisfacturi, nulli intererimus post-hac refectioni sine spirituali communione, quæ instituat hunc Sancto suspirio: *Jesu! ubi es? habet jam corpus sua: da & animæ tuæ: auge nimirum fidem, firmassem, accende charitatem, ut nil mihi sapiat, nisi tu Deus meus, & omnia.* Post mensam addatur Officium de Sanctissimo Altaris Sacramento. Cum Jesu profunt omnia.

## III.

**O** Frivolas mortalium excusationes! ut uxori, bobus & asinis serviant, tem-

tem-



tempus suppetit amplissimum! hodie ad coenam invitati magnam, ut reficerentur splendide, & pretiosè de mensa Domini, tempus defuit comparendi omne, quia clamabant: *habe me excusatum.* Sic ludunt filii hominum cum Deo & coelo. Verùm hic lusus periculosus est. Deus enim non irridetur! fili! si ludimus, ludimur ipsi.

*Instructio meritoria.*

Non sic nos, ò fili! ad coenam magnam, ad gaudia æterna nos accingamus, curiositatem in publico cavendò, & *Rosarium Gloriosum* ordinario adjungendò cum voto: *dissolvi cupio, & esse cum Christo.*

Dominica III. post Pentecosten.

EXHORTATIUNCULA I.

**S**Cit filius, quantum sit gaudium in coelo, & in corde Jesu super uno peccatore poenitentiam agente. Augeamus hoc gaudium Christo, quia meruit de nobis. Augeamus declinantes à malo, & facientes bonum. Augeamus succur-

currendò periclitantibus tot animabus,  
idque per devotas preces, & suffragia ar-  
dentissima. Frater redimat fratrem.

*Instructio meritoria.*

Ut igitur convertantur peccatores  
obdurati ad Dominum, vitámque seriò  
detestentur præteritam, invocemus nos  
omnes Cœli incolas per *Litanias de*  
*omnibus Sanctis*. Et versus quatuor  
mundi plagas genuflectentes signemus  
cum dicto! *Jesu! fili David! miserere*  
*peccatorum!* digna invocatio, per quam  
obtinebitur multorum conversio.

II.

**C***harissimi!* rogat hodie S. Petrus,  
*humiliamini sub potenti manu Dei,*  
*ut vos exaltet in tempore visitationis.*  
Abjiciamus igitur cogitationes excelsas, &  
in simplicitate cordis coram Deo, & ho-  
mine ambulemus. Cum simplicibus est  
fermocinatio ejus.

*Instructio meritoria.*

Duodécim schedulas conscribamus, &  
cuilibet certum actum, seu opus humili-  
tatis inferamus, & quem manè extraxe-  
rimus ex urnula, fideliter exequamur.

E

O pra-

O praxin animæ opportunissimam! porro ad impetrandum donum virtutis adeò necessariæ (qualis est humilitas Christiana) sæpiùs percutiamus pectora nostra cum deprecante publicano dicentes: *Domine! propitiùs esto mihi maximo peccatori.* Recitetur & Psalmus: *Domine! non est exaltatum cor meum.* Glorificat Deum, qui se humiliat.

III.

**O** Quàm sollicitus, quàm laboriosus fuit Christus, donec ovem inveniret deperditam! nonaginta novem reliquit, ut reduceret errantem. Et quæ hæc errans ovicula, nisi anima nostra? & hanc unicam habemus, & tamen, ne perdamus, vix unquam curamus ferriò, & sollicitè vigilamus; dum interim corpori damus, & permittimus omnia. Verùm ô fili! *Si non es pro temetipso sollicitus modo, quis erit pro te sollicitus in futuro?*

*Instructio meritoria.*

Æstimatio nobis deest pretiosæ animæ, ut acquiramus, quotidie, antequam

quam eamus cubitum, flexis genibus  
examen nocturnum instituamus, con-  
scientiam discutiamus, & an per diem  
plus corpori, quàm animæ datum, con-  
sideratè inspiciamus. Subjungatur Psal-  
mus *miserere* expansis brachiis. Fili!  
vis praxin aliam? quoties inciderimus  
in peccatum (ô si contingeret nun-  
quam!) statim intra nos recolligamur,  
in terram procidamus, & cum filio pro-  
digo ad cœlum clamemus: *Pater! pec-  
cavi! ne intres cum servo in iudicium  
tuum.* Dein datâ, & oblatâ occasione  
promittamus confiteri. Latet vipera,  
ubi peccatum: Quis diu intus toleret?

Dominica IV. post Pentecost.

EXHORTATIUNCULA I.

**A**D æterna! ad immortalia! fili mi!  
invitamur, dum monet Christus:  
*Duc in altum.* Tandem valedicendum  
sæculo, pravis desideriis, & cupiditati-  
bus, si cupiamus soli adhærere Christo  
Domino! contemnenda hæc sunt tran-  
sitoria, si ambiamus coelestia. O igitur  
nobile donum! contemptum sæculi!

*Instructio meritoria.*

In hoc strenuè nostram exerceamus animam. Quod fiet, si vel hodie ad discursus vanos, inutiles, aut minùs Christianos clausurimus aures, aut in honestiores, & exemplariores mutaverimus, aut nos penitùs subtraxerimus. Venenum quis hauriet? interim pro impetranda erga vanitates solida nausea  
34. *Pater & Ave* in honorem totius ætatis & plenitudinis Christi recitemus. Qui cum Christo, mortuus est sæculo.

## II.

**L**aborant Apostoli per totam noctem, & capiunt nihil. Non mirum: In tenebris navigabant. Quæ nox ista? ô fili! nostra peccata! laboremus, quantum possumus, quantum & volumus. Nisi peccata fugerimus graviora, frustra sunt omnia, frustra jejunia, frustra vigiliæ, & elemosynæ! ô stultum laborem! & quoties sic laboravimus?

*Instructio meritoria.*

Si unquam, vel hodie deploremus ruinam honorum operum, quam incurrimus quolibet mortali peccatô; sed ut  
recu-

recuperemus denuò, graduales Psalmos pro opportunitate temporis recitemus coram Crucifixo, aut SS. Venerabili. Quid si & actum jungeret Sacri rigoris? qui castigat corpus, amicus est Dei. Corpori flagella! animæ beata gaudia.

III.

**I**N verbo tuo laxabo rete, ait Petrus ad Jesum. Laxavit: Et ô prodigium! conclusit ingentem piscium multitudinem! ô lucrum obedientiæ, ac confidentiæ Christianæ! profectò plus mi fili! lucrabimur uno actu humilitatis, & simplicis obedientiæ, quàm si per integros menses, & annos in poenitentiis, in humiliationibus, & corporis castigationibus nos exerceamus ex propria voluntate. Quid punit in inferno Deus nisi voluntatem propriam? quid gaudet, & exultat in coelo, nisi cæca, & humilis obedientia?

*Instructio meritoria.*

Sed hîc labor, hîc opus est! quis eò pertinet? en! medium! nunquam exeamus imposterum S. Confessionale, nisi petitò, & obtentò speciali actu Obe-

E 3

dien-

dientia, quem & nobis ipsis determine-  
mus, ut benedicat Pater spiritualis.  
Oremus & Feriali VI. ad pulsum Agoniae  
Domini quam devotissime, nostramque  
infirmam voluntatem commendemus  
in vulnera morituri Jesu. Moritur ille,  
ut vivamus obedientia.

## Dominica V. post Pentecosten.

### EXHORTATIUNCULA I.

**V**irtutem Pharisaicam hodiernum  
detestatur evangelium; genui-  
nam vero, & vere Christianam, quae ha-  
betur per humilitatem, & simplicitatem  
cordis intimam, commendat plurimum.  
Si Christiani sumus, boni sumus in opere.  
Fili! nolimus solum videri; judicia ho-  
minum fallunt; non vero opera virtu-  
tum. Judicet nos Deus! quid homines  
ad nos?

### *Instructio meritoria.*

Procul cum hypocrisi, & pietate ad  
speciem? ut possideamus virtutem soli-  
dam, Spiritum Sanctum cum septem  
donis hodie invocemus, & minus Offi-  
cium de Eo recitemus. Et ut ambule-  
mus

mus viam Domini eò ferventiùs, & tutiùs, cubiculo oculum Dei aut calamò, aut penicillò pictum affigamus. Ubi Deus in corde, ibi nec hypocrisi, nec fraudibus locus. Apage ergò cum illo Machiavellico: *Homo me videt. Principium sit sanctius nobis: Deus me videt.*

## II.

**F**ili! quid hodie nobis Christus Jesus? tremenda verba, dum dicit: *Nisi abundaverit justitia vestra plus quam Pharisaorum &c. non intrabitis in regnum cælorum.* Ecce! nec virtutes coram Deo securæ sunt; nam vana gloria, aut propria complacentia plerumque eas reddunt invisæ Divinis oculis. Chære! scimus ergò, quid supremo persequamur odio? scimus & quid fugiamus continuò.

*Instructio meritoria.*

Ne tinea tam noxia nostra devoret sancta pietatis opera, quid agendum? meridie, & vespere nostram renovemus intentionem matutinam cum protestatione Davidica sæpiùs aut mentaliter,

E 4

aut



aut vocaliter repetenda : *non nobis, Domine! non nobis, sed Nomini tuo da gloriam. Vel: Te decet laus! tibi gloria Deo Patri & Filio cum Sancto Spiritu in secula seculorum. Amen. Quis ut Deus? Reddite Deo, quæ Dei sunt: Cæsari, quæ Cæsaris.*

## III.

**Q**uis diligit Deum? qui colit, & diligit fratrem, ac proximum. Cæsarem offendimus, si in hujus statuam expuimus. Deum aggredimur, & contempnimus, quoties spernimus fratrem. O fili! quid agimus? non quos natura, & carnalitas, sed quos vult Lex Dei, & rectæ rationis, venerari, & amare oportet. Secus nobis fiet ut Ethnicis, & gentilibus, ut brutis, & bestiis, quæ non amant, nisi quod placet sensualitati. Quales Christiani sumus nos? quales Jesu pro inimicis orantis, & morientis discipuli? ô confusio, si nulla amplius inter Ethnicos, & Christianos distinctio!

*Instructio meritoria.*

Charitas excelsum Spiritûs Sancti donum!

num! ut mereamur, ad noctem quotidie 7. *Pater & Ave* in honorem septem Verborum Morientis in Cruce Jesu persolvamus, & quidem pro omnibus, & singulis, qui nos offenderunt, aut contristârunt. Nunquid redditur pro bono malum? Apud impios. Christianus didicit in bono vincere malum.

Dominica VI. post Pentecost.

EXHORTATIUNCULA I.

**I**Nanes hodie prohibet curas Christus Dominus, & vanas sollicitudines circâ transitoria, dum mandat: *Quærite primum Regnum Dei; cætera adjicientur vobis.* Extrâ, quidquid quarimus, aut affectamus, jam nostra infelicitas est. Et hanc quis appetet?

*Instructio meritoria.*

A sæculi nugis, & actibus ut liberemur, & liberè ad coelestia, ac immortalia avolemus nostris desideriis, frequenter hodie vel soli in cubiculo, aut devoti in templo studeamus esse, & pro impetrando perfecto sæculi contemptu in honorem totius Ætatis Christi 34. *Pater*

*Et Ave* oremus. Ludere expedit cum mundo, ne ludamur ab eo.

## II.

**F**ili! Alloquor vos hodie verbis S. Richardi à S. Victore rogantis: *O infelix anima! Et misera! usquequo sollicita es, Et turbaris erga plurima! porro cum unum sit necessarium, tandem aliquando fige desiderium, dilige unum.* O Unum! & hoc ô dilecte! quanto nobis est pretio? vix modico. Detestemur ignaviam! deploremus errorem. In uno omnia.

*Instructio meritoria.*

Pro omnibus, sive Religiosis, sive Laicis sæcularibus in negotiis mundanis ex officio detentis, ut seipos non negligent in puncto salutis æternæ, hodiernam sacrificii auditionem cum SS. Rosario offeramus Deo. Præmium erit nostrum, fovisse pietatem.

## III.

**T***Riduo jam sustinent me,* ait Christus de suo dilecto populo. Non murmuravit, non indignabatur, sed patienter Dei expectabat voluntatem? ideò & gran-

grande prodigium, quod hodie coràm  
cernere meruit, in multiplicatis pani-  
bus. O si nos Deo committeremus,  
nostrásque curas, in eum jaçtaremus,  
quàm pacifici, quàm hilares, & quieti  
ambularemus. Fili! murmur, ira, im-  
patientia quid profuit? nihil, quin no-  
cuit plurimùm.

*Instructio meritoria.*

Preces mensales cum summa devotio-  
ne persolvamus, de cibis vilioribus li-  
bentiùs, & studiosiùs sumere assuesca-  
mus; pretiosioribus verò nos indignos  
reputemus. Post mensam visitemus  
Sanctissimum, & pro liberali conserva-  
tione, ac sustentatione nostrùm 15. *Pa-  
ter & Ave* recitemus. Gratis cor Jesu,  
& Dei beneficia in templo stant nobis  
aperta. Cur petimus nihil?

Dominica VII. post Pentecost.

EXHORTATIUNCULA I.

**T**Remenda verba! *non omnis*, ait  
hodiernum Evangelium, qui di-  
cit: *Domine! Domine! intrabit in re-  
gnum caelorum.* O fili! factis opus est,

E 6

non

non verbis, non nudis propositis, & meris velleitatibus ad hoc, ut simus hæredes Regni cœlorum. O quantum erravimus! dum sæpius pia proposita pro nostro beneplacito aut immutavimus, aut negleximus, idque pro nostro majori commodo.

*Instructio meritoria.*

Falsi Christiani sunt, qui multa promittunt, & reddunt modicum. Ut pro tot neglectis piè conceptis propositis satisfaciamus, in proxima confessione nobis ipsis specialem devotionem, aut pœnitentiam zelò sanctiori dicemus, & ad eam peragendam à Patre spirituali licentiam cum Benedictione humiliter petamus. Labi, & inconstantem esse, humanum est: Satisfacere, & compensare, sanctorum. Addamus & per septem dies quotidie unum ex Psalmis pœnitentialibus.

II.

**F**ili! quale dat hodie monitum mihi, & ipsi Divinus Magister? sic ille ad discipulos: *Attendite à falsis Prophetis.* Vigilemus, ne & nos de falsis Pro-  
phe-

phetis simus, simulando virtutem, fraternam pacem, & charitatem fingendo, in faciem proximum laudandô, & in absentia hujus eum traducendo, vilipendendo. Et quis ab hac hypocrisi, ab hac simulatione, & astutiâ securus? solus, qui in simplicitate, & humilitate cordis cum Deo, & proximo ambulat. Ut fiat à nobis, pro anima propter simulationes luente inter flammis offeramus *Vesperas* ex Officio Defunctorum. Quàm sancta hæc pietas!

*Instructio meritoria.*

Christiani non est adulari, & alterum laudare in faciem: Et quid modernis temporibus communius? frequentius? fugiamus hoc turpe adulandi genus, & nec alios (dum audiunt præsentis) nec nos ipsos commendemus. Virtus tam propria, quàm aliena cupit celari. Solus Deus illius præmiator est. Ne incidamus in sortem politicorum, & falsorum adulatorum in honorem septem Verborum morientis Jesu recitemus expansis brachiis 7. *Pater & Ave* cum totidem osculis terræ, & filiali protestatione:

*Veritatem, & Justitiam dilexi, iniquitatem odivi.*

## III.

**F**ulmina audimus : *omnis arbor, quæ non facit fructum bonum, excidetur, & in ignem mittetur.* Et necdum benè, & exemplariter vivere incipimus, aut statuimus? ubi timor Gehennæ? fili! aut quis poterit de nobis habitare cum igne devorante? quis habitabit ex nobis cum ardoribus sempiternis? timeamus, ne excidamur. En! securis jam ad radicem posita est! ad fructus igitur poenitentiae!

*Instructio meritoria.*

Quæ autem sterilis arbor illa? anima meritâ & virtutibus vacua, & tota otiosa, ut nostram impleamus, nulla transcat dies sine actu virtuoso, & meritorio. Libellum itaque conficiamus nobis, cui ante somnum quotidie inseramus actum exercitum præsertim illius virtutis, quâ indigemus maximè. Hic libellus quid loquetur in die mortis? audient, qui morituri nobis quondam assistent; quia omnia quâdam dulcedine, & consola-

Dominica VIII. post Pentecosten. III

solatione cœlesti videbuntur repleta.  
O praxin! ô exercitium agonizantibus  
saluberrimum, uti & suavissimum!

Dominica VIII. post Pentecost.

EXHORTATIUNCULA I.

**D**iffamatur hodie famulus, & inde  
incidit in disgratiam Domini sui.  
Ecce! quanta vis in lingua, modica car-  
nis portiuncula! jam audio Bernardinum  
Senensem exclamantem: „ O lingua ne-  
„ quam! tu charitatem extinguis: tu de-  
„ primis justos: magnificas impios: tu  
„ fraticidia, parricidia, & cæteras cru-  
„ delitates virulentâ impietate commit-  
„ tis. Fili! premamus labia, si loqui re-  
nuant sancta!

*Instructio meritoria.*

Plerumque judicantur, traducuntur,  
& examinantur dicta, ac facta aliorum:  
ad propria cæcutimus ut talpæ. Fili!  
non sic ampliùs. Aliena approbemus  
illô charitatis principiô: quod tibi non  
vis fieri, alteri ne feceris. O tesseram &  
cordibus, & cubiculis affigendam! in  
satisfactionem omnis in loquendo no-  
stræ



stræ incuriæ recitemus speciale hodie  
Rosarium cum 35. osculis terræ in hono-  
rem Verbi Incarnati. O Verbum Dei!  
te laudent, te glorificent discursus mei!

## II.

**R***Edde rationem villicationis tuæ.*  
Fili! est & ipse vocatus in domum  
Patris Cœlestis, tanquam servus fidelis.  
Dedit talenta, dedit & dona plurima.  
Attendat, ut illis sibi emat Dei gloriam,  
suam, & aliorum animam. Sic enim  
semper parati inveniemur, ut non tam  
severo Judici, quàm Patri respondeamus  
quondam clementissimo. Operemur  
bonum! mors pulsac!

*Instructio meritoria.*

Abusum villicationis, seu beneficio-  
rum, ac talentorum ut compensemus,  
animas in purgatorio specialiter nobis  
habeamus commendatas, quarum si de-  
bita sacris exegerimus suffragiis, dele-  
bunt & illæ nostra. Eâ enim mensurâ,  
quâ mensi fuerimus, remetietur & no-  
bis. Misereamur proin, & per 8. dies  
*Vesperas* ex Officio Defunctorum quo-  
tidie

tidie dicamus. Frater adjuvet fratrem!  
aut frater non est.

III.

**J**am non poteris villicare. Cui loquitur Deus? Amice! vobis, & mihi. Omnia profectò tempus habent. Veniet tempus, ubi amplius non poterimus operari. Agendum est modò, quod egisse expedit æternùm. Quis jam perdere audebit tempora? quis indulgere facetiis, insulsis nugis, aut inconvenientibus levitatibus? absint hæc à filio. Ad majora natus & vocatus est. Audeat generosiora!

*Instructio meritoria.*

Qui sanctè, & beatè vivere intendit, sollicitudinem omnem impendat distributioni temporis diurnæ. Huic novam intentionem vel maximè sumptò in refectorio prandiò adeuntes Sanctissimum præfigere assuescamus. Non pro libitu invertamus Ordinem vitæ, imò factæ sine rationabili causa mutationis, aut interruptionis pœnam à nobis exigamus in die S. Confessionis. Sic reviviscant amissa tempora.

Do.

## Dominica IX. post Pentecost.

## EXHORTATIUNCULA I.

**A**H! fili mi! quid hoc? Jesus plorat. Videt Jerusalem: Et flevit super illam. Adeò hujus civitatis ingraticudo, & inconstantia displicuit Dei Filio. O si intueatur & nostram! an non renovabitur dolor? & id quoties factum hætenus?

*Instructio meritoria.*

Abstergamus lacrymas, & in compensationem ingraticudinis nostræ coram Sanctissimo nos abscondamus, dictaque prostrato corpore de offensis humili culpâ *Litanias majores* subjungamus. Humilitate, & oratione placabitur offensus, & contristatus amor.

## II.

**H**Eu! quàm tremendas ex hodierno Evangelio percipimus minas! *Venient dies in te*, ait Christus ad Jerusalem: *Circumdabunt te inimici vallo, & coangustabunt te undique.* Fili! quando hæc erunt? dum dies venerit mortis. O diem horrendam! & tamen vix memores

mores tui vivimus. Imò vivimus, quasi nunquam morituri. Væ imparatis! justò Dei fiet judiciò, ut, qui nos parare cùm possemus, noluimus, non possimus, cùm velimus.

*Instructio meritoria.*

Præveniamus hos terrores: Et quotidie ante lectum stantes nostrum, nos ipsos interrogemus: *Paratusne ad mortem? si non hodie, quando eris?* elicitò dein doloris perfecti actu, factaque nostræ incuriæ deprecatione incumbamus lectulo, sub dulci cantico: *Nunc dimittis servum tuum in pace.* Qui quotidie mori paratus, non timebit à die novissimo. Pro tranquillâ, & consolatoriâ mortis horâ, præsertim pro alleviandis, vel omninò impediendis illis extremis angustiis spondeamus, nunquam omittere Litanias Lauretanæ, quibus in fine *tria Ave* annectamus à B. V. S. Mechtildi commendata.

III.

**F**ili! Amamusne Christum? ergò & ecclesias, & templa veneremur. *Domus enim mea*, ait hodie, *domus orationis*

*tionis est.* Si orationis : O quanta ibi à nobis expectatur humilitas ! modestia ! puritas ! fervor & devotio ! O si in his locis intueremur angelos , & sanctos coelites ! quæ tunc nostra foret confusio ! quantus nos vagabundos, negligentes, & immodestos invaderet sanctus horror !

*Instructio meritoria.*

Non patiamur, ut templum Domini fiat spelunca latronum, garrulitatum, & scandalorum. Zelemur Christi Præsentiam, aut garrientes monendo, aut strepitus, & varios impetus ex incuria fortè excitandos præveniando, aut pro excitationis satisfaciendo per oscula terra. Deleamus & nostras irreverentias, & flectentes coram SS. Venerabili per octo dies antè cubitum expansis brachiis Psalmum *Miserere & De Profundis*. Oremus autem pro illis animabus in purgatorio, quæ propter irreverentias in Ecclesiis commissas acerrimè cruciantur inter flammæ. Hæ impetrabunt spiritum fervoris, & devotionis.

Do-

Dominica X. post Pentecosten.

EXHORTATIUNCULA I.

**D**uo ascendunt ad templum orantes : Unus superbus Phariseus ; alter humilis publicanus. Primus repellitur : Recipitur secundus. Fili ! detestemur fastum, & superbiam Pharisei ; imitemur autem publicani humilitatem. Superbis resistit Deus : Humilibus dat gratiam. Peccavimus ? bone ! cum publicano percutiamus pectus, & humiliemus in oculis Domini capita nostra !

*Instructio meritoria.*

Humilitatem virtutum Reginam, ut & sibi, & suis impetret, per septem dies quotidie unum ex Psalmis poenitentialibus coram Crucifixo, vel Sanctissimo recitet : Quin ut cum publicano in omni simplicitate cordis coram Domino Deo in dies ambulet, ab hodierno die vim naturæ inferat, & sedere ad mensam discat erecto semper, & ab omni pariete vel sedili libero corpore sub tessera hodierni Evangelii : *Domine ! propitius esto mihi maximo peccatori.* Pergamus

in

in hoc exercitio, & magni erimus coram Domino. Hic humilitatem respicit, non commoditatem.

## II.

**Q**uid in Pharisæis, & hypocritis, ac omnibus impiis periculosissimum? propria confidentia. *Confidunt enim in se tanquam iusti*, qui extremi interim sunt hostes Dei. O miseros! quos propria excæcat confidentia! Fili! si iusti sumus, in nosipos confidere non debemus, nec bonum, quod possidemus, nobis adscribere condecet. Unde enim iusti? unde boni? unde pii vel devoti? nonne Dei gratiâ sumus id, quod sumus?

*Instructio meritoria.*

Tinea est propria complacentia, & in suas vires nimia confidentia. Confidit Lucifer, confidit & Adam cum mille aliis. Quò devenerunt? heu! legamus Scripturas, & exhorrescimus. Ad debellandam hanc cruentam bestiam cuilibet operi in nostro cubiculo, vel cellâ peragendo flexis genibus tria *Ave* cum totidem *Gloria Patri*: Et collectam: *Actiones nostras quaesumus &c.* præmic-

mittamus, nosque mentaliter Omnipotentiae, Sapientiae, & Bonitati Divinae affectuosè commendemus. Hic quid difficultatis? non video. Fiat igitur, quod summopere placebit SSS. Trinitati. Quid habes, quod non accepisti?

## III.

**C**haritas fraterna ô quàm pretiosum Dei munus! sed cur inter homines tam rarum? quia dantur multi, qui *aspernantur ceteros*. Sunt verba hodierni Evangelii. Estne evidentior superbiae nota contemptu, vilipensione nostri proximi? ô fili! spernimus fratrem, jam sprevimus Jesum. *Quod enim uni ex minimis meis fecistis, mihi fecistis*. Tali illusori & contemptori quid expectandum in die Judicii? lata jam est sententia? *Nescio vos*.

*Instructio meritoria.*

Ad implantandam solidam, & radicalem nostrum ipsorum vilipensionem, & aestimationem omnis proximi 12. actus propriae excellentiae, & complacentiae contrarios exerceamus, & exercitos per manus R. Patris Spiritualis SSS. Trinitati



tati offeramus. Porrò pro illis, quibus natura nostra videtur minùs devota, aut favorabilis, opera totius diei hodiernæ immolemus Crucifixo. Et hoc est rapere violenter cœlum! si non volumus resistere naturæ corruptæ, resister Deus. Heu! & hoc quâ violentiâ, ira, rigore, furore?

## Dominica XI. post Pentecost.

### EXHORTATIUNCULA I.

**M**iracula quis nescit Christi Jesu? hæc ne cui dicerent Apostoli, præcepit in hodierno Evangelio Dominus. O fili! si Dei Filius jactantiam fugit, & elationem: Quomodo nos affectemus? qui elatus est, sedet in cathedra pestilentiæ, éstque discipulus cadentis Luciferi. Et hunc nos sequi?

#### *Instructio meritoria.*

Superi avertant! *elatum cor*, ait S. Bern. *expers est pietatis, & compunctio- nis.* Contrahamus sanctam consuetudinem ad laudes humanas erubescendi, & ad alienas cordialiter gaudendi, eâsque ampliandi. Laus propria sordet: Nec  
adu-

adulator hanc promover. Non attendamus, ne virtus periclitetur. Ut in simplicitate cordis serviamus Deo, insurgente motu propriæ complacentiæ statim flectamus, & Psalmum 130. *Domine! non est exaltatum cor meum &c.* recitemus addendo pro clausula frequentius nobiscum repetenda: *Te decet Laus, tibi gloria &c.*

II.

**D**Ocet hodie Jesus benè audire, benè & loqui. Heu! quàm infirmi hîc sumus! accedamus ad Christum, ut bonum tribuat auditum pro instinctibus Spiritûs Sancti, & linguam multæ prudentiæ pro cultu Dei, & charitate proximi.

*Instructio meritoria.*

Sanabimur, si multum loqui, & frequentius esse inter homines non amaverimus. Nemo securiùs loquitur, quàm qui libenter tacet, & tempore suo obmutescit. Discretam taciturnitatem, & charitatem fraternam in conversatione exhibendam ut impetremus à Jesu taciturno, nullius hodie interrumpamus:

F

di-

discursum, vel in alterius verba involemus, & antequàm locum conversationis accedamus, coram Sanctissimo s. *Pater & Ave* oremus. Sic socius erit Christus inter pericula.

## III.

**S**urdus, & mutus adducitur Christo. Nunquid repulit? minimè. Expedi, quandoque surdum, & mutum esse. Surdum ad audiendos sermones statim indecentes: Mutum ad proferendos. O si hæc surditas esset in sensibus nostris! quàm quietiores, quàm tranquilliores viveremus in conscientis nostris!

*Instructio meritoria.*

Detrahere, & detrahentem audire, utrumque damnabile est. Cautelam statuamus verbis nostris. Defectus proprios inspiciamus, & aliorum facta nunquam judicemus, aut propalemus. Quod tibi fieri non vis, alteri ne feceris. Circumspectio ô quàm nobis necessaria! ut obtineamus, ad signum salutationis Angelicæ omni devotione, attentione, & humilitate oremus, tribus Ave interponendo petitiones sequentes: *Jesus, qui opera*

opera nostra sanctificet. *Jesus, qui verba nostra ad suum Divinum Beneplacitum disponat, ac dirigat. Jesus, qui omnes cogitationes sibi attrahat. Capiat memoria Jesu devota!*

Dominica XII. post Pentecost.

EXHORTATIUNCULA I.

**H**Omo quidam incidit in latrones. Infelix casus! expectat & nos. Jam latrones imminent vana gloria, propria complacentia, elatio, & superbia, quæ non raro actus & thesauros deprædantur virtutis. Fili! non timebimus? sine Deo incedemus? sensibus & carni serviemus?

*Instructio meritoria.*

Qui thesaurum suum publicè portat in via, deprædari desiderat. In Ecclesia oremus non cum sibilo, altis suspiriis, insulsis tunctionibus cordis, sed in compunctione, & recollectione mentis. Sic nostra odiosa nemini erit devotio. Novies recitemus Canticum *Magnificat*, & ad præcipuas actiones repetamus Davidis tesseram: *Non nobis Domine! non*

*nobis.* Gloriam non dabimus alteri,  
Deo & huic soli debetur.

## II.

**E**T nos languemus in fide cum ho-  
dierno Jerosolimitano! languemus  
in spe, & charitate. Ah! si Jesus suâ  
nos inviseret gratiâ! oleum suæ charita-  
tis vulneribus nostris affunderet, suos-  
que in humeros susciperet, ut à morte  
liberet!

*Instructio meritoria.*

Suscipiet, si charitatem fraternam non  
amiserimus. Sunt inter hos miseri, &  
derelicti plurimi. Dispensemus eis ver-  
bum consolationis v. g. infirmos visi-  
tandô, desolatos animandô, consilia an-  
xiis suggerendô, ad confidentiam erga  
Deum, & B. V. Mariam inflammando.  
Quòd non fecerimus hucusque, satisfac-  
ciamus, & 15. *Pater & Ave* in hono-  
rem 15. Mysteriorum SS. Rosarii persol-  
vamus. Quid sine his Mysteriis?

## III.

**I**N opere supererogatorio ô quantum  
præcelluit Samaritanus hodiernus?  
fili! inspiciamus Evangelium, & mirabi-  
mur

mur excessum amoris, & sancti laboris. Cur nos vix non jam in Dei servitio dicimus: *Sufficit.* Communia duntaxat præstitimus: Majora expectat & meretur Deus. *Majori labore acquiritur major merces.* S. Thom. Aq.

*Instructio meritoria.*

Tepiditati nondum ad sanguinem usque restitimus. Hæc sanguisuga quomodo nostra non inficit merita? tollamus, & omnibus SS. exercitiis, Ecclesiæ Mysteriis, Sacrificiis & Rosariis, erectis manibus, & libero corpore assistamus cum omni devotione, principalioribus præmittentes studiis hymnum: *Veni Creator Spiritus!* maledictus, qui opus Dei facit negligenter!

Dominica XIII. post Pentecost.

EXHORTATIUNCULA I.

**D**ecem mundati sunt leprosi, & rediit unus, ac gloriam Dedit Domino Deo. Quanta ingratitude mortalium! quoties & nostra jam mundata est anima sanguine Jesu! erimusne & nos de numero ingratorum?

*Instructio meritoria.*

Abfit! recolamus ergò hodie beneficia Dei præcipua, nimirum beneficium Creationis, Redemptionis, Conservacionis, & Vocationis, & Psalmum: *Benedic anima mea Domino, & omnia, quæ intra me sunt, Nomini sancto Ejus &c.* Coram Sanctissimo Venerabili, aut Crucifixo quàm devotissimè recitemus, sæpiùs per diem versùs quatuor mundi plagas genuflectentes, & desiderantes: *Ubique laudetur! ubique adoretur! ubique ametur Trinus, & Unus Deus! Sanctus! Sanctus! Sanctus!*

## II.

**Q**uis sine lepra? qui sine peccato? Ubi autem ille? fili! sùmne ego, vel ipse? nónne peccavimus omnes in Fratrem nostrum Christum Jesum? Quid jam remedii, ut sanemur cum hodiernis leprosis? En! dat divinus Medicus: *Ite! ostendite vos sacerdotibus.*

*Instructio meritoria.*

Et hoc ô quàm opportunum consilium! toties deficimus: Et vulnera tegimus? toties infirmamur: Et ulcera occul-

occultamus? sic à lepra sanabimur nunquam. Singulîs mensibûs cum R. Patre spirituali conferamus de statu animæ, & salutis. Certè immutabimur inde toti. Præparationi ad S. Confessionem impostero semper præmittamus hymnum: *Veni S. Spiritus! reple tuorum corda fidelium &c.* Servemûsque silentium usque ad peractam S. Communionem rigidissimum. Hæc cura pro leprosis.

III.

**Q**uis decem leprosos sanavit? Jesus. Quid retribuerunt? *Non est inventus, qui rediret, & daret gloriam.* O quàm citò evanescent Dei beneficia in cordibus mortalium? & nos inter eos fuimus! fili! doleamus, &

*Instructio meritoria.*

Dignè satisficiamus ad Nomina SSS. Trinitatis, ad *Gloria Patri &c.* ad Nomina Jesu, Mariæ, SS. P. Benedicti caput profundius inclinandò, in Ecclesia, in choro neminem aspiciendò, quieto corpore psallendò, omnem impetum, ac strepitum, aut errores in divino Officio committendos prævertendò, cavendò.



128 Dominica XIV. post Pentecosten.

In honorem SSS. Trinitatis *coronam B. V. M.* cum omni devotione, & reverentiâ oremus, & in fine *Te Deum Laudamus* addamus. Te decet laus! te decet hymnus Potens Domine!

Dominica XIV. post Pentecost.

EXHORTATIUNCULA I.

**S**ic est : Nemo potest duobus servire Dominis : Nemo carni simul, & Divino Spiritui. Fili! quis horum in nobis prævaluit hætenus? si passio; si corrupta natura : O quanta exin nobis indignitas! Seneca dixit : *Nulla servitus turpior, quam voluntaria.*

*Instructio meritoria.*

Ad libertatem filiorum Dei aspiremus. Obtinebimus, si appetitui concupiscibili quoad excessivas recreationes, & nimias hilaritates majorem vim intulerimus generosiores. Hodie mediam horam nobis subtrahamus de tempore recreationis, illamque lectioni spiritualis libri applicemus. Et hoc est gaudere in Domino, & recuperare deperdita tempora.

II.

## II.

**Q**uid est vita hominis? respondet hodiernum Evangelium: *Fœnum agri, quod hodie est, & cras mittitur in clibanum.* Et tamen tantus est amor vitæ, ut si vel à longè fiat mortis mentio, vix non desperatur. O fili! hæc, quæ dicitur vita, nihil est, nisi mors quædam perpetua, & exilium à cœlesti felicitate, ad quam procreati, & nati sumus. Vitam amamus: Patriam non curamus: Quid hoc?

*Instructio meritoria.*

Sequamur Gentilis Senecæ monitum: *Meditare quotidie mortem, ait. Qui hoc dicit, meditari libertatem jubet. Qui mori didicit, servire dediticit.* Censilium opportunissimum! huic ne desimus, hodie aliquid per quadrantem de morte legamus, cœmeteriûmque defunctorum cum *Vesperis* ex Officio eorum visitemus. Beati, qui libenter sunt, & agunt cum fidelibus defunctis!

## III.

**A**D quid tam inutiles curæ? semper de cibo, de potu, de vestitu, de sa-

nitare corporis cogitamus, loquimur, aut ordinamus; interim vix animæ recordamur. Quænam in nobis pars præstantior? pro anima utique mortuus est Christus? & hanc tam turpiter, & viliter tractamus! quia siti, fame perire sinimus. Meritò ingemiscit S. Xaverius: O anima! imago Dei! quis te satis æstimat? satis curat? pro te vitam, & sanguinem Deus ponere dignatus est, cujus nec stillam pro toto extrâ te mundo posuisset. Fili! ubi curæ nostræ, si non pro salute?

*Instructio meritoria.*

Corpori debentur paleæ; animæ cælestes deliciae. Concedamus, & hodie post quamlibet refectionem, aut etiam recreationem Sanctissimum Altaris Sacramentum visitemus, & spirituali communionem sanctè consolemur jugiter suspirantes ad Eucharisticum Deum: *Quemadmodum cervus desiderat ad fontes aquarum; ita desiderat anima mea ad te Deus!*

Do-

Dominica XV. post Pentecost.

EXHORTATIUNCULA I.

QUàm inscrutabilia sunt Dei judicia! defunctus hodie effertur, & hic unicus filius Matris suæ. Mors parcat nemini. Rapit æquè rosas & flores, quàm foenum sterile & aridum. Fili! ne noceat animæ, nostra sit cura unica. Verùm *animam mors non perdit, sed mala vita, abeuntque felices, quorum sine crimine vita est.* Cato.

*Instructio meritoria.*

Quæ autem sine crimine vita? si frequentiori confessione emundata; si quotidiano examine nocturno ritè perlustrata, & in amore ergà Deum, ac horrore ergà omne peccatum de novo obfirmata. ita fiat! consilium est: non respuamus. Hinc extraordinariam confessionem instituamus cum certis operibus supererogatoriis. Communis vita si non ferveat, displicet Deo.

II.

SUmus & nos ex discipulis Christi. Ita nostra sunt vota. At si Christum

F 6

non

non sequamur ubique, uti factum in hodierno Evangelio à primis Apostolis, indigni sumus hoc nomine. Non audienda ergò corrupta voluntas. Abneganda est. Præcedit Jesu imitatio, & sequela. Servus sit major Domino? obstupescite coeli super hoc!

*Instructio meritoria.*

Sed quomodo abnegabimus nos, & nostra omnia? desideriiis veniendi post Christum ardentissimîs: Oblivione propriæ commoditatis: Contemptu temporalium, & amore cœlestium. Recitemus igitur Psalmum: *Eruçtavit cor meum Verbum Bonum: Dico ego opera mea Regi.* Quid triste nobis accidat, si adhæreamus duci, & Magistro nostro? gaudia omnia, quæ infrà Jesum sunt, vel mendacia sunt, quæ decipiunt, vel inania, quæ non satiant.

III.

**M**iseretur Christus plorantis mulierculæ, & filium reddit matri suæ. Est fortè & inter nos, qui nostrâ charitate, & misericordiâ indiget? fili! aperiamus manum, expandamus sinum, demus

mus consolationis, patientiæ, & mansuetudinis verbum. Hæc lex evangelica. Quâ mensurâ mensi fuerimus, remetietur nobis.

*Instructio meritoria.*

Reflexè attendamus, ut hodie neminem (præcipuè nullum ex superioribus, vel confratribus) offendamus, sed ubique debitam in eos charitatem, & reverentiam promoveamus, verba offensiva, acuminosa, & pungitiva impediamus, & omnium paci, ac tranquillitati studeamus. Quapropter coram Sanctissimo, vel in cubiculo coram Crucifixo flexis genibûs *Litanias de omnibus Sanctis* offeramus pro stabilienda in cordibus nostris perpetua charitate, mandante Christo Jesu: *Mandatum novum do vobis, ut diligatis invicem, sicut dilexi vos.*

Dominica XVI. post Pentecost.

EXHORTATIUNCULA I.

**F**ili! consideret, obsecro, quomodo invidi Pharisæi omnia Christi observent vestigia, ut invenirent materiam,

eundem arguendi de peccato. Sed frustra. Firmior inde stetit Christi Innocentia; ipsi verò suò miseri tabuerunt livore. Plerumque invidia interficit se ipsam. O igitur malum virulentum! fugiamus: Est enim (teste S. Basilio) *diaboli inventum.*

*Instructio meritoria.*

*Charitas vetat*, ait Didacus stella, *ne quid mali proximis suspicemur.* Delinquimus in hoc sæpè mi fili! satisfaciamus, & vel hodie in discursu, conversatione de proximo semper bona, utilia, & consolatoria loquamur, & proferamus. Et si non possumus, prorsùs taceamus. Ut Deus invidias, & iudicia impediatur temeraria, recitemus Psalmum: *Benedicam Dominum in omni tempore &c.* cum S. Augustini desiderio: Rector meus! tolle invidiam, & da tuam Charitatem.

II.

**F**ili dilectissime! quale audio præceptum ex hodierno Evangelio? *Da huic locum*: Lego in eo. Sed cui? soli & unico Deo. Huic omnis debetur honor

nor, & gloria. Procul igitur cum fastu,  
& arrogancia! ab hac initium sumpsit  
omnis perditio.

*Instructio meritoria.*

Altæ in nobis assurgunt cogitationes?  
de officiis! de honorum titulis, de mul-  
tis, ac magnis studiis ac scientiis etiam  
in futura meditatur tempora? heu! non  
demus his locum: Sed Deo, & religio-  
sæ indifferentiæ, ore & corde nobiscum  
illud Christi repetentes: *Non veni face-  
re voluntatem meam, sed ejus, qui misit  
me.* Et ut vincamus eò celerius, speciale  
propositum circa hoc superbiæ genus  
examini particulari, & generali indera-  
mus; certò expugnabimus. In adora-  
tionem morientis ex humilitate Jesu ex-  
pansis brachiis recitemus 34. *Pater &  
Ave.* In humilitate Dei Unigenitus cæ-  
pit, continuavit, consummavit. *Quid  
superbis terra, & cinis?*

III.

**E**st & aliud Christi consilium pro  
conservanda charitate, & Christia-  
na humilitate. Dicit enim: *Non di-  
scumbas in primo loco.* Honorare om-  
nes



nes homines, semper pium, justum, & sanctum : Velle seipsum : semper periculosum, quia superbum. Fili! volumus amari? amemus. Honorari? honoremus. Honor honorem provocat.

*Instructio meritoria.*

Sed quomodo exhibendus honor? politici honorant pedibus : nos capite, & humili corde. Nec simus acceptores personarum. Quotquot, & quales nos transeunt, salutemus, & salutandō veneremur. Si obviaverint inimici, vel nobis minùs devoti, aut accepti, duplicemur, ut duplō major sit victoria. Virtuti tribuamus locum, non passioni. Dicamus Psalmum : *Domine! quid multiplicati sunt, qui tribulant me : multi insurgunt adversum me &c.* & pro omnibus adversariis addamus *Officium minus* de quinque Vulneribus Jesu. Ab his discamus diligere inimicos.

Dominica XVII. post Pentecost.

EXHORTATIUNCULA I.

**O** Fili! quid turpius humanâ astutiâ? en! hodie omnes Pharisei Christum

stum venerantur, & vocant suum Magistrum, non quasi vellent discere veritatem, sed ut caperent in verbis propriis. Sic sonat aliud in ore, & aliud latet in corde. Nos veritatem amplectamur: & delectabimur in Domino, dabitque petitiones cordis nostri. Perdet enim Deus omnes, *qui loquuntur mendacium.*

*Instructio meritoria.*

Ut liberemur ab hac miseria, per aliquot confessiones nos specialiter accusemus circa ea, quæ vel charitatem, vel simplicitatem, aut veritatem in nobis minimè commendabant. In satisfactionem quoque eorum omnium dictorum, aut factorum per septem continuos dies quotidie unum Psalmum ex pœnitentiis oremus cum 12. osculis terræ. *Magna est veritas, & prevalet.* 3. Esdr. 4.

II.

**I**Nvitamur ad amandum: *Diliges Dominum Deum tuum.* Pudeat nos minùs amare Deum, quàm canes Dominos suos! Canis utut objurgetur, aut lapidetur ab hero, amat tamen, non potest repelli; sed magis accedit, sequitur

tur illum, & caudâ blanditur. O fili! lædit, & flagellat nos aduersitate Deus; quia meruimus. O quomodo non refugimus? lamentamur statuentes in corde: *Non seruiam.* Et hoc in amando non sit vinci à canibus? Amor! serò novimus te!

*Instructio meritoria.*

Amorem probat patientia. Quidquid submiserit hodie Deus, tacito patiamur corde, & ad noctem pro tanto dilectionis signo *Te Deum Laudamus* intonemus. *Domine! hîc patientiam, postea indulgentiam!* S. Laur. Justin. Faciamus & urnulam, in quam sortium locò injiciamus exercitos patientiæ, & fortitudinis actus. Quis tollet nisi Deus?

III.

**B**Is dat, qui citò amat. Nil, quod nimis grave, præcepit Deus. Fili! citò reddamus. Rem deplorandam! præcipit gravissima mundus: Et suscipiuntur; petit Deus solam præceptorum observantiam (& hâc quid facilius?) petit sui amorem, & reverentiam, (quid dul-

dulcius? ) & non impetrat. Quanta injustitia! ingratitude quanta!

*Instructio meritoria.*

Hæc scimus? hæc audimus? hæc experimur? cur patimur? amans pro amante vigilat, & nos pro Dei honore. Itaque pro compensatione neglecti, & contempti Dei tam boni ter veniamus ad Sanctissimum Altaris Sacramentum, culpas ibi deprecemur etiam aliorum, & in satisfactionem expansis brachiis S. Rosarium addamus ordinario, ad quodlibet *Pater* ingemiscetes: *Amor! & tu non amaris?*

Dominica XVIII. post Pentecosten.

EXHORTATIUNCULA I.

**O** Quid attentat hodie Gerasenorum stulticia? rogant Christum, *ut transfret à finibus eorum.* Nescivit hic ingratus populus, nec agnovit Dominum suum; ideò oblitus est Creatoris sui. Dilecte fili! erubescat ad hæc genuinus animus! transeant à nobis vana, & stolidi mundi desideria, ut teneamus, quæ

quæ Christi Jesu sunt, & perpetua. *Hic ergo spes! si cupimus: Beati sumus. S. Xav. Instructio meritoria.*

Quò vitiò plerumque cor clauditur Christo? intemperantiâ, & superfluitate in cibo, potu, & somnò. Est, ut dicimus, nobis Christus super omnia. Si ita: Ergò & nostra impendamus studia, ut vel hoc mense quoad temperantiam, & sobrietatem insignia exhibeamus opera, & aliis exempla demus illustrissima. Specialiter Feriam IV. VI. & Sabbathum abstinentiis sanctificemus. Sunt dies Redemptionis nostræ! recordemur!

## II.

**F**lli! ecce turbæ cingunt undique Christum, & glorificant eum. Quæ causa? viderunt enim prodigia. Sed ò debilem fidem! veniet tempus, & clamabunt: *Crucifige! Crucifige!* ita habet stylus sæculi. Dum nos felices, honorat; dum inter adversa, refugit, & nauseat. Dilecte! vide, cui fidas. *Quicquid dicit, promittit, & consulit mundus, falsum, & dolosum est.* Didacus stella.

In-

*Instructio meritoria.*

Pro tentatis, captivis, & derelictis visitemus Deum Eucharisticum in Ecclesia, utque mittat deforsum lumen Divinae consolationis, & eorum corda roboret donò Christianae patientiae Rosarium offeramus de 5. Mysteriis Dolorosis. Hic stylus Christianae pietatis est.

III.

**F**ili! nos tangit hodiernum Evangelium, dum quaerit? *Ut quid cogitatis mala in cordibus vestris?* Scimus, quam noxia, quam inutilia, quam & indecentia sint, quae nostris occurrunt sensibus, & cogitationibus. Interrogabimur ideò & in tremendo iudicio: *Quare cogitasti hanc rem?* 2. Reg. 14. & quid respondebimus? haud poterimus praetimore, & tremore. Nam *abominatio sunt Domino Deo cogitationes male.* Prov. 15.

*Instructio meritoria.*

Cogitationes pravas sentire equidem peccatum non est; sed in has consentire. Impugnamur ab his gravius, & instantius? statim flectamus, & cogitationes  
pessi-

142 Dominica XIX. post Pentecost.

peffimas in corde Jesu, & Mariæ abscondamus subjungendò *quinque Pater & Ave.* Si autem Officium de Eorum corde ad manus, devotè persolvamus, Inde nobis omne lac, & mel. Gustemus! probatum est.

Dominica XIX. post Pentecosten.

EXHORTATIUNCULA I.

**Q**Uæritur de veste nuptiali? sine hac non admitteremur ad nuptias. Induimus, si à benè cœptis nunquam desistamus. Inveniet sponsum, qui non amittit vitæ sanctæ propositum. O quid nobis S. Chrysofomus: *Si à cœpto bona vitæ cursu defecerimus, totum perdidimus, totum corrupimus.* Hæc verò perditio ad quid?

*Instructio meritoria.*

Sunt autem plerumque hominum dicta, aut adversa, quæ nostra immutant proposita. Ah! verbum! heu! adversitatis umbra poterit talia in Dei famulum? quodcunque horum contigerit hodie nobis, per manus omnium SS.

Mar-

Martyrum deponamus in dulcissimo  
Corde Jesu cum suspirio : *Domine ! vim  
patior ! responde pro me*, ut augeat pa-  
tiendi desiderium, addamus Psalmum :  
*In Convertendo, Dominus Captivitatem  
&c. statuentes cum Jobo : Justifica-  
tionem meam, quam cœpi, non deseram.*

II.

**F**ili! unde hæc nobis gratia, quòd  
rarò acerbos in nobis experiamur,  
& sentiamus iracundiæ, invidiæ motus?  
hæc unde? En! respondet D. Bernar-  
dus : *Gratias agat Corpori, & Sanguini  
Christi; quoniam virtus sacramenti ope-  
ratur in ipso.* Cum gaudio itaque fre-  
quentemus mensam Angelicam. Quò  
frequentius, eò fructuosius. Invitat  
Augustinus : *Accedite cum fide, tremo-  
re, & dilectione.*

*Instructio meritoria.*

*Omni bûs diebûs Dominicis communi-  
candum suadeo, & exhortor, inquit  
præfatus Ecclesiæ Doctor. Fili! ego au-  
tem vos exstimulo, & rogo : Omni bûs  
diebûs certò spiritualiter communicet;  
quia Christus ad vos : Ecce ego vobiscum  
sum*



*sum omnibus diebus usque ad consummationem seculi* : O si vel ad refectionis horam Illius recordaremur ! quàm sanctius nos reficeremus ! incipiamus hodie ! filio, & famulo Dei non est crastinum. Dicamus Litanias de SS. Altaris Sacramento.

## III.

**M**ulti ad epulas invitati : Sed pauci electi. Quis est in culpa ? an Deus, qui non dedit omnibus gratiam, ut venirent. Credidit id impius Calvinus. Non ita nos, ô fili ! sola voluntas propria exclusit à nuptiis. Sic S. Textus : *Nolebant venire.* O nolle ! ô pauci electi !

*Instructio meritoria.*

Vocanti Deo non cooperari, gratiam vocationis despiciere est. Ne veniamus in sortem infelicium, paucos, sed egregios in vita spirituali operarios sequamur, & de una confessione in aliam nobis certa proponamus pietatis opera, cum præscitu, & licentia R. Patris Spiritualis fideliter exequenda. Pro beneficio autem mirabilis Vocationis Divinæ persolvamus

vamus Eucharisticum Psalmum : *Benedic anima Domino, & omnia, quæ intra me sunt, Nomini sancto ejus.* Gratiarum actio est novarum provocatio. Amat sæculum gratos : Quid ergò Deus ?

Dominica XX. post Pentecost.

EXHORTATIUNCULA I.

**O** Fili! quid hoc? tot homines moriuntur quotidie : Et nos adhuc vivimus hilares, & integri? an non cum Jeremia exclamemus : *Misericordie Domini! quia non sumus consumpti.* Ubi corpus? ubi anima, si Dominus non adjuvisset nos? gaudet Deus esse beneficus. Expectat, qui accipiant. Promptior ipse largiri, quàm nos accipere.

*Instructio meritoria.*

Cur beneficium conservationis quotidianæ perpendimus tam modicè? tandem ô fili! tandem ô dilecte! compensem, tam in examine particulari, quàm generali illud in specie rememorandò, & in perpetuam Conservatoris venerationem manè, ac nocte *Te Deum Laudamus* orandò. Respondeamus & Ser-

**G** vatori

vatori Optimo vitâ prorsus exemplari, & virtuosâ : *Qui enim de sua spe, & operatione securus est, confestim aperit pulsanti, & cum tempus propinque mortis advenerit, de gloria retributionis hilarescit.*

## II.

**Q**Uatuor sunt hominum genera, ait S. Bernardus, qui cupiunt possidere regnum cœlorum, aliqui violentâ rapiunt sui abnegatione : Alii eleemosynis mercantur. Hi occultando opera bona furantur : Illi ad hoc compelluntur immisione variarum afflictionum, & multarum ærumnarum. Charissime ! ex quorum numero sumus nos ? si ex omnium : Gaudeamus in Domino, & observemus, quod S. Augustinus : *Ora, ut traharis.*

*Instructio meritoria.*

Ita est ! trahat nos Deus, ut toti vivamus ad hujus nutum, & Beneplacitum. Renovemus igitur S. Professionem, & hujus renovatione nostram animam cum omnibus potentiis, & viribus SSS. Trinitati de novo consecremus in fine  
sub.

subjungatur Canticum: *Magnificat* cum  
S. Bernardi desiderio: *Deus! pro his  
omnibus, quod rependam, non habeo, ni-  
si tantum, ut diligam.*

## III.

**I**ncrepamur jam iterum à Christo di-  
cente: *Nisi signa, & prodigia vide-  
ritis, non creditis.* Misera fides! quæ  
sensus regitur. Palpari non vult Deus,  
sed in simplicitate cordis, & vivacitate  
spiritûs adorari. Beati, qui non vide-  
runt, & crediderunt. Terreat nos in-  
credulitas Thomæ; trahant verò evan-  
gelia Ecclesiæ!

*Instructio meritoria.*

Optima oratio, quæ procedit com-  
puncto corde. Non ore, sed mente ve-  
niamus ad Dominum, præsertim, dum  
hora Sacramentalis Communionis, &  
Adorationis SS. Venerabilis. Ad Fidei  
nostræ probationem, quoties intendi-  
mus in ecclesia precibus, id erectis ma-  
nibûs, & clausis oculis fiat. Per hos  
intrat spiritus, non per manus, aut sensus  
vagabundos, atque dissolutos. Sub-  
jungantur denique *Litania* de SS. Alta-

148    Dominica XXI. post Pentecost.  
ris Sacramento, aut de Suavissimo No-  
mine Jesu.

Dominica XXI. post Pentecost.  
EXHORTATIUNCULA I.

**I**Rascitur hodie Dominus non famulo,  
sed hujus iniquitati, non passione  
odii, sed amore justitiæ, non turbatione  
mentis, sed fortitudine spiritûs. Hæc  
ira justa, & sancta est. Quæ verò no-  
stra? an non quotidiana? sed & iræ ho-  
dierni Domini in evangelio simillima?  
fili? *omnis amaritudo, & ira & indigna-  
tio tollatur à vobis.* Est mea cum Paulo  
ad Ephesios admonitio.

*Instructio meritoria.*

*Iraisci hominis est, ait Hier. sed iram  
non perficere, Christiani.* Ergò dum mo-  
tus vehementior insurgit ad iram, intrà  
nos recollecti, à nobis ipsis sine mora  
interrogemus: *Cur irascendum? qui-  
bus irascendum? quomodo irascendum?  
quando irascendum? quousque irascen-  
dum?* sic rarò, vel nunquam succumbe-  
mus. Ne impotens hæc in nobis præ-  
valeat passio, *Feriam VI.* jejuniò, & si-  
lentiò

lentiō veneremur, oraturi in honorem  
septem Verborum mansuerissimi in  
Cruce morientis Jesu 14. *Pater & Ave.*  
Ira nulli medetur malo, nullum extenuat,  
omne augmentat.

II.

**O** Crudelem famulum! consequitur  
misericordiam à Domino : & suo  
confamulo negaverat omnem. Fili!  
sumus nos veri Christiani? en! litteram  
characteristicam, fraternam misericor-  
diam. Ideò S. Eusebius Cæsar. *Qui*  
*misericiadi caret, Christianus non est.*  
*Judicium sine misericordia, qui non fecit*  
*misericiadiam.* S. Jac. 2. 13.

*Instructio meritoria.*

*Si cluseris viscera misericordie* (affir-  
mat S. August.) *indigenti, omnino & tibi*  
*claudetur janua Christi.* Sic nostrum pro-  
positum, omni justa petenti hodie statim  
annuere in omni charitate & mansuetu-  
dine. Fortè non est, quod demus in  
eleemosynam? sunt tamen bona verba,  
& pia in templis suffragia, quæ hodie  
offerantur cum reflexione ad omnes  
Christi pauperes, & indigos. In fine

addamus Psalmum: *Ad te levavi oculos meos &c.* Fratres sumus Jesu? & charitatem nesciamus?

## III.

**Q**uid sibi hodierna Evangelii verba: *Sic & Pater meus cœlestis faciet vobis.* Profectò poenam innuit Talionis. Libenter remittamus offensas; aliàs nec Deus remittet nostras. Iram nunquam perficiamus; aliàs & Deus acuet suam. Malum pro malo non reddamus; aliàs reddet & Deus. Quàm tremendum, incidere in manus Domini!

*Instructio meritoria.*

Ergo & quod nobis non volumus fieri à Deo, nec alteri faciamus: Et quod cupimus fieri nobis, præstemus & alteri. Volumus honorari, æstimari, ab omnibus amari; honoremus & alios præsertim illos, quos vel ut discipulos, vel ut minus morigeros, vel ut indoctos, & talentis naturæ vacuos ore contempimus, & mente vilipendimus. Sex actus speciales exerceamus hodie, quibus charitatem non fictam, sed verè Christianam probemus

Dominica XXII. post Pentecost. 151

bemus orantes pro invicem *Officium*  
*Mariae majus.* Charitate discernuntur  
Mariæ filii, & clientes.

Dominica XXII. post Pente-  
costen.

EXHORTATIUNCULA I.

**F**ili! propriâ se hodie Christo, &  
populo prodidere nequitiâ astuti  
Pharisæi. *Ea enim est peccati proprie-  
tas* (ait Didacus de Cast.) *ut seipsum  
prodat, tacentibus omnibus, & loquen-  
te nemine.* Et non fugiemus confusio-  
nem tantam, cujus causa sibi omnis pec-  
cans? Malo mori, *quam fœdari, & ita  
prostitui.* Ignominia omnis in peccato!

*Instructio meritoria.*

Cupimus metere honorem? ergò  
virtutem seminemus. Quod fiet per ac-  
curatam sacrorum Exercitiorum obser-  
vantiam, & expeditionem distributio-  
nis temporis fidelissimam. Ne verò  
propria nos confundat conscientia, ore-  
mus Psal. *In te Domine speravi &c.* ni-  
hil pretiosius tempore! & heu! nihil

G 4

hodie



hodie vilius reputatur ! transeunt dies salutis, & nemo recogitat !

## II.

**O**Ingrata gens Judæorum ! iterum consilium ineunt, ut caperent Jesum in sermone. Ne capiamur & nos in verbo, os nostrum à malo, & pravo custodiamus eloquio, & caveamus ab omni multiloquio. In hoc quis effugiet peccatum ? Verè Salomon : *Qui custodit os suum, custodit animam suam. Qui autem inconsideratus est ad loquendum, sentiet mala.* Quis nos liberabit ? prudentia, & circumspectio.

*Instructio meritoria.*

Involare in verba aliorum, & discursus interrumpere, nimix garrulitatis, & effusionis est. Qui moribus studet, potius audit, quàm loquitur. Subtrahamus hodiernæ recreationi unum, vel alterum quadrantem, & quem fortè dedissemus garrulitati, impendamus vel orationi in templo ; vel occupationi piæ in cubiculo. Deploremus deperdita vanitatibus tempora, & SSS. Trinitati offeramus

*Offi.*

*Officium minus cum 30. Pater & Ave.*  
Gaudium ut sit plenum, in Deo, & tem-  
poris usu quæramus.

III.

**A**D imaginem Dei factus est homo.  
sed ô fili! jam interrogamur: cu-  
jus est nostra? *Repræsentemus* (monet  
D. Bernardus) *in nobis imaginem Christi*  
*in appetitu pacis, in intuitu veritatis, &*  
*in amore charitatis.* Adhortatur & S.  
Ambros. *Honorem Divinae Similitudi-*  
*nis, ad cuius formam creatus es, nobili-*  
*tate morum, exercitio virtutum, digni-*  
*tate meritorum habere, contende.* Se-  
quamur monica. Sancti dederunt.

*Instructio meritoria.*

O pudor! exclamat S. Bernardus:  
De vase stercoreum semper curas, de  
imagine Dei non curas. Imaginem seu  
vitam nostram ut sollicitè curemus, tem-  
perantiæ, modestiæ, & taciturnitati in-  
signiter studeamus, earumque exerci-  
tio totum hunc mensem tribuamus quo-  
tidie orantes: *Te ergo quæsumus, tuis fa-*  
*mulis subveni, quos pretioso sanguine re-*

G. 5

demi.

154 Dominica XXIII. post Pentecost.

*demisti.* Addamus Rosarium dolorosum, memores illius Xaveriani proverbii: *Quid te abjicis ad infima, qui natus es ad summa?*

Dominica XXIII. post Pentecosten.

### EXHORTATIUNCULA I.

**V**idet in platea publica hodie Princeps Evangelicus Christum. Ecce! citò accessit, & prostratus in terram adoravit. Si hæc in platea, quæ fieri oportet in ecclesia? S. Antoninus nos instruit dicens: *Ad ecclesiam sit humilis, & devotus accessus, nec ibi fiant parlamenta, nec judicia, vel vaniloquia, sed auditio, & meditatio attenta divinorum.* Ubi plerumque cor nostrum in templo? fortè ingemiscimus: *Cogitationes meæ dissipatæ sunt, torquentes cor meum!*

#### *Instructio meritoria.*

Quàm graviter increpat S. Chryso-  
mus, quos in templo cernit irreverentes.

tes. *Tantus est risus, exclamat, tanta turbatio, sicut in balneis, sicut in foro; alios video stare, & nugare, dum preces fiunt. O audaciam! quando erit salus? quomodo placabimus Deum? nescis, quod cum Angelis stes? & cum hymnos dicis, & stas ridens. Etenim non esset mirum, si fulmen dimitteretur non solum in illos, sed & in nos; fulmina enim hæc digna sunt? Fili! qualis lectio illa? recordermur sæpiùs, & cum majori timore, & reverentiâ flectamus in Ecclesia. Hodie Officium minus de SS. Altaris Sacramento persolvatur. Deus adest! apage cum cæteris aut sensuum, aut cogitationum insaniis!*

## II.

**O** Gaudium! revixit per Christum filia, quæ mortua fuit. O fili! hujus filie resuscitatio est animæ peccatricis justificatio, teste S. Bonaventurâ. *Filia tua est propria anima, defuncta per culpam, cui manus Christi imponitur per gratiam. Misereamur animæ! hac perditâ, perdidimus omnia. Animæ invigilat*

156 Dominica XXIII. post Pentecost.  
gilat Deus : Invigilant inferi : Quid  
homo ?

*Instructio meritoria.*

Sic est. *Omnes peccatores Christus resuscitat, si cessent à peccato, & ex toto corde pœniteant.* Euseb. Emiss. Pœnitentiæ igitur sacramentali addamus & aliam, quam vocamus, supererogatoriam, cum licentia tamen R. Patris spiritualis peragendam. Quò plus dabitur, eò plus accipietur. Dileximus multùm ? peccata remittentur plurima. In satisfactionem totius vitæ nostræ recitemus *Psalms pœnitentiales.* Hoc lytrum, quò ingratitude humanæ expunguntur debita.

III.

**C**Itò movetur Divinus medicus ad resuscitandam puellam, nec multis indigebat cæremoniis. *Tenuit manum ejus, & surrexit puella.* Longè major mora in resuscitatione Lazari. Non mirum : Nam quadriduanus veteranum nobis significat peccatorem, cujus resuscitatio propter procrastinationem est  
diffi-

difficillima. Aut non peccare! aut citò  
pœnitere! dilata pœnitentia rarò vera.

*Instructio meritoria.*

Infirmamur? fili! citò ad Medicum.  
Cadimus? sine mora ad sublevantem  
nos! porriget labentibus potentem dex-  
teram, si frequentem adhibeamus con-  
fessionem. Huic assuescamus, & ab ea  
absterrentem diabolum non audiamus.  
*Ubi, & quando contigit malum, ait S.*  
*Aug. ibi iterum moriatur malum.* Pœ-  
nitentes ut verè nos probemus, *Litanias*  
*oremus de omnibus Sanctis.* Præive-  
runt! sequamur.

Dominica XXIV. post Pente-  
costen.

EXHORTATIUNCULA I.

**O** Fili! tremenda sunt omnia, quæ  
in hodierno leguntur Evangelio.  
Dies tremenda! dies illa, dies iræ, cala-  
mitatis & miseriæ, dies magna, & ama-  
ra valdè instat, jam citat, & vocat.  
*Væ mihi (suspirat S. Martyr Cyprianus)*

158 Dominica XXIV. post Pentecost.

*cum veniam ad iudicium? dilecte! quid nos?*

*Instructio meritoria.*

Ne incidamus in manus irati & offensi Judicis, censors, & iudices simus nostrum, & nunquam cubitum & lectum petamus, nisi depositio nocturno anime testamentum, quod inveniendum in devotis, & obviis Libellis precatoriis. Hodie renovemus *formulam Votivam cum Litanis Lauretanis*. Teneamus Mariam, nec dimittamus, donec benedixerit nobis: Potens est enim. S. Bernardus.

II.

**E**Ruditè ex hodierno concludit Evangelio S. Augustinus dicens: *In quo quemque statu invenerit suis novissimus dies, in hoc eum comprehendet mundi novissimus dies; quoniam qualis in die isto quisque moritur, talis in die illo iudicabitur.* Ut boni inveniamur, semper mortem habeamus ante oculos. Cui mors non familiaris, sibi inimicus est.

*In.*

*Instructio meritoria.*

Sed quomodo familiares erimus? visitemus frequenter cæmeteria, & pro omnibus defunctis devotè oremus Psalmos *Miserere & De Profundis*. Sista-  
mus nos quoque ad noctem coram Crucifixo quasi morituros quotidie. Repetamus sæpiùs morientis Jesu ultima verba. Non moritur, qui vivit sibi semper mortuus.

III.

**T**unc plangent. O tunc! ô plangent  
amarum! Fili! ut non habeamus,  
quod tunc plangamus, præterita peccata deploremus cum lacrymis; futura verò caveamus intendendo operibus bonis. Doluisse de præteritis, & timuisse de futuris summa est prudentiæ humanæ. Non dimittamus.

*Instructio meritoria.*

Peccavimus multum! solvamus plurimum! quæ enim proportio inter finitum, & infinitum? instrumenta faceri rigoris si habeamus, corpori applicemus.



160 Dominica XXIV. post Pentecost.

cemus. Non recalcitrabit amplius; si  
non: petamus, emamus! optima co-  
mes ad patriam odium sui, & jugis  
poenitentia. Tres actus austeritatis  
exerceamus. Vivamus! sed in spi-  
ritu. Caro occidit! spiritus  
vivificat!



EX.